

Proud Papua New Guineans Say YELLO with... **CITIFON**

10¢ per sms Citifon to Digicel or Be Mobile Rates

39¢ call/min Enjoy straight rates with Citifon

1¢ sms ALL DAY ALL NIGHT

2¢ call/min

*Service is available in all major centres across the country Call Customer Care 345 6789 a product of TELUS P.N.G.

Intanet long Pocket




Only k199

The Great Value Huawei 6150
Nogat letpot? Noken wari!
Yu ken kisim intanet wantaim gutpela prais Huawei 6150 long K199 tasol! Hariap promosen long liklik taim tasol

Call 123 www.digicelpng.com




Redi long pait long Yunaitet Nesens intanesenel oporesen...

WANTOK WARIA: Long bik-moning long Trinde, 110 PNG Difens Fos paitman bilong Charlie kampani i kalap long foapela Blackhawk helikopta aninit long lukaut bilong wanpela platun bilong Namba 3 Batalion bilong Royal Australia Rejimen long painim na pasim ol giaman 'paitman i kamapim ol pasin pait namel long ol wanples'. Poto i soim ol soldia i redi long go insait long ples bilong holim ol paitman. Dis-pela trening i makim pinis bilong Ekseisais Wantok Waria (infentri).
Poto: Australia Hai Komisin

Gavman bai rausim 2010 Envaironmen Loa senis

Veronica Hatutasi i raitim

OL PAPA graun insait long dispela kantri i ken amamas long wanem, nau gavman i rausim Envaironmen Loa bilong las yia we gavman i bin senisim long pasim ol papagraun i go long kot sapos ol i no amamas long ol disisen we gavman i wokim long ol ples we ol risos i stap long en.

Dispela i bihainim disisen we Nes-senel Eksekyutiv Kaunsel (NEC) i wokim long dispela wik, bilong rausim Envaironmen Ekt o Loa 2010 we gavman bilong Se Michael Somare i bin mekim long ol papagraun bilong ol risos eria long PNG long kotim gavman o ol divelopa kampani.

Long las yia taim gavman i laik kamapim senis long Envaironmen Loa na rausim pawa bilong pipel na kot, i bin gat planti tok agensim i kam long pablik na ol Non Gavman Ogenaisesen long kantri.

I go moa long pes 2

Insait Mendi Daiosis opim nupela skul bilding na haus slip - **Pes 13**
Barike i gat kik yet - **Pes 19** Jackson ples balus lukim nupela senis - **Pes 27**



GLOBE ...the perfect choice

VITAMIN ENRICHED

More Easy, More Tasty, More Healthy.



Gavman bai rausim 2010 Environmen loa senis

I kam long pes 1

Environmen na Konsevesen Minista, Thompson Harokaq'veh, taim em i tokaut long dispela samting aste, i tok em i amamas olsem NEC i tok orait long rausim dispela Loa, na bai Palamen i toktok long em na tok oraitim, long sindaun bilong em long mun Novemba.

Mist Harokaq'veh i tok olsem taim em i kamap nupela Environmen na Konsevesen Minista, rausim dispela senis long Environmen Loa we pastaim gavman i bin kamapim long las yia tasol, i bin samting em i tok em bai mekim pastaim.

"Taim Palamen i tok oraitim dispela Loa, Environmen Ekt na ol wok long tok oraitim ol samting i kam aninit long environmen bai go het. Na bai stretim wanpela long ol nogut pasin we gavman i yusim krangi eksekutiv pawa bilong em," Mista Harokaq'veh i tok.

Em i tok pastaim Somare i no bin harim ol edvais bilong Environmen na Konsevesen Dipatmen husat i no bin wanbel long Environmen Loa senis, tasol i bin go het na tok oraitim dispela 2010 Environmen Loa.

Mista Harokaq'Veh i tok taim fomaolpela gavman i wokim senis, ol no bin gat bilip long pastaim gavman na dipatmen na dispela i ken brukim loa tu.

Em i tok gavman i bin wokim dispela 2010 Environmen Loa senis long stopim ol papagraun i go long kot sapos ol i no laikim disisen we gavman i wokim long graun na ol risos bilong ol.

Mista Harokaq'veh i tok em i bikpela samting long kot i gat rait long glasim ol disisen we gavman i mekim aninit long Environmen Loa i mas stap.

Em i tok moa olsem em i bikpela samting tu olsem ol rait bilong ol papagraun long askim ol kot long glasim i mas stap.

Em i tok tru, kirapim bek dispela Environmen Loa na rausim senis i ken mekim ol risos projek i weit na i no stat long taim ol i laikim long en taim ol papagraun i kisim ol samting i go long kot, tasol dispela samting em i save kamap insait long ol demokretik gavman na kantri.

Em i tok gavman i bin kamapim dispela Environmen Loa long yia 2004 na em i bin wok i stap gut lon g givim balens long nits bilong environmen na groa bilong ikonomi.

Em i tok dispela loa i gat bikpela wok na moa yet, long dispela taim we PNG i lukim gutpela developmen long maining, ges, wel na ol narapela eria, long lukim olsem kantri i gat balens namel long lukautim environmen na ikonmik developmen.

Long sait bilong putim tambu long yusim ol plastik long PNG, Mista Harokaq'veh i tok dipatmen bilong em i wok yet na tu, toktok wantaim ol bisnis haus long dispela samting.

Em i tok ol bai wokim ol plen we em i bilip bai ol i go hetim pastaim long pinis bilong dispela yia.

Em i tok taim ol i tambuim ol plastik long dispela kantri, ol kampani bai yusim ol bek we ol i ken yusim gen na tu, taim ol i lapun pinis, ol i ken tromoim na ol i sting (biodegradable).



BLEKHOK: Las wik Sarere, tupela Blekhok helikopta i karim ol bikman bilong PNG Difens Fos (PNGDF) na Australia Difens Fos long Goldie Bareks i go long Murray Bareks. Tupela difens fos i wok long karimaut ol trening program bilong ol. Wok bilong ol helikopta bilong Australia Difens Fos (ADF) bai no inap pinis yet. Long wanpela kibung long tok klia long wok redi bilong 2012 Nesanel Ileksens, PNG Ilektoral Komisina Andrew Trawen i tokaut olsem ol bai nidim wanpela moa helikopta bilong halivim kampani Helifix na PNGDF long karim ol balot pepa na ol ileksen opisal long mekim wok. PNGDF i tok em i redi long halivim Ilektoral Komisen wantaim wanpela moa helikopta, we ol i lukluk long baim long ADF na ol patrol bot bilong en. *Poto na Stori: Neville Choi*

Morobe na kantri lusim gutpela lida

PIKININI Morobe, Utula Samana, husat i bin dai long las wik, i wanpela strongpela na trupela lida husat i bin kamapim planti developmen long provins bilong em yet na tu, long dispela kantri.

Planti bikman long politik, gavman na pablik i toktok long ol bikpela na gutpela wok we dispela "paia lait" lida i bin mekim taim em i holim ol bikpela wok olsem namba wan primia bilong Morobe provins, em wanpela bikpela provins long kantri wantaim moa long 600,000 pipel long en.

Em bin kamap rijinel memba bilong Morobe provins long 1987 inap long 1992, Sekreteri bilong Agrikalsa, Fiseris na Laipstok na ambaseda bilong PNG long Yunaitet Nesens.

Long olgeta ol bikpela wok em bin holim, em bin wanpela

strongpela lida na "ejen bilong senis", olsem memba bilong NamatGavana bilong Nu Ailan na pastaim praim minista we Mista Samana i bin wok aninit long gavman bilong em i tok.

Se Julius i joinim ol arapela lida na tingim Mista Samana olsem strongpela na paia lida na sampela taim tu, bai go egensim ol samting we em i bilip olsem i no inap helpim pipel, olsem man we pipel i stap namel stret long lewa bilong em.

Se Julius i tok Morobe, famili na pipel bilong em i mas amamas olsem ol i kamapim wanpela narakain, gutpela, strongpela na paia lida long dispela kantri.

Ben Micah, em sif bilong opis bilong praim minista i bin makim nesanel gavman long kisim bodi bilong leit Samana i go bek long pipel bilong em

long Morobe, bihain long gavman i wokim stet funerel bilong tingim na tok tenkyu long laip na wok bilong em long Mosbi las wik Sarere.

Taim em i givim bodi bilong Mista Samana i go long Tutumang Haus lon g Lae aste, Mista Micah i bin luksave long kontribusen bilong em (Samana) long developmen bilong PNG olsem wanpela sivil sevan, diplomat na politisen.

"Utula i bin wanpela strongpela na gutpela lida husat i bin givim stia long planti lida long Morobe na PNG long kamap olsem ol ejen bilong senis.

"Ol i save tok olsem em i "papa bilong nau Morobe we i kamapim palnti senis long provinsel na nesanel level.

"Long makim nesanel gavman, mi tok tenkyu long ol Morobe pipel long givim yumi gutpela lida tru.

"Tru Mista Samana i lusim yumi, wok, laip na memori bilong em bai stap long planti yia i kam," Mista Micah i bin tok.

Morobe provins i bin holim stet funerel bilong tingim na tok tenkyu long lida bilong ol.

Planti tausen pipel i gat long em ol famili, hauslain na ol pipel bilong Morobe i bin pulap kapsait na soim sori bilong ol long top lida, pikinini, brata, kandere, papa na bubu bilong ol.

Aste bihain long stet funerel sevis, ol bin planim Mista Samana long matmat i stap long olupela ples balus long Lae we matmat bilong kasen bilong em em na pastaim Morobe edministreta, Ainea Sengero, i slip i stap long en.

Mista Samana i lusim bihain meri na ol pikinini wantaim tu ol bubu bilong em.

HOLY LAND tours ISRAEL & JORDAN

INCLUSIONS: Return airfares Port Moresby - Jordan via Singapore & Colombo, 3 star hotel accommodation as per itinerary, return airport transfers, meals where specified, all tours, coach transportation & fees, English speaking guide during Holy Land Tour, Visa fees & border taxes for Jordan & Israel, all airline taxes and surcharges.

10 NIGHTS & 11 DAYS
FROM
K9499*

CHECK OUT THESE **AMAZING** HOLY LAND ATTRACTIONS

> The Sea of Galilee > Nazareth > Church of St Joseph > Ein Karem
> The Wailing Wall > Church of the Holy Sepulchre

Call toll free on **180 3444** or contact your nearest Air Niugini Travel Centre or Travel Agent to secure your Holy Land Tour!

*Price based on a minimum of 15 persons. Price is per person and subject to change and availability. Strict conditions apply.





MAS NA SINGSING: Ol meri bilong Enga i wokabaut na paitim kundu i go long namel bilong Hagen taun. Poto: Pater Philip Gibbs

Luksave na strongim ol meri

Pater Philip Gibbs i raitim

HAGEN taun i bin kamap narakain tru taim 2,000 meri i bin lain na wokabout i go olsem mak bilong luksave na strong bilong ol meri long dispela wik.

Em ol Katolik meri bilong Goroka, Simbu, Sauten Hailans,

Enga na Hagen i kamap long namba wan Hailans Rijen Bung bilong ol Katolik meri.

Long Mande ol i bin wokabaut long taun na singsing na pre olsem laip bilong ol i ken kisim strong long laip bilong Kraus.

Tunde ol i bin luksave na tingim we laip i go long taim pikinini i stap long bel bilong mama inap long yumi dai.

Long Trinde, ol i bin luksave na tingim "Kalsa bilong yumi".

Ol i soim ol kainkain gutpela pasin bilong ples na we ol meri i ken helpim ol yet na kisim mani long wokim bilum na somap na kain samting olsem.

Long Fonde, ol i bin wokim tok-save long givim long ol Bisop na gavman tu long kain hevi olsem

sik kensa long bilum bilong bebi.

Gavman i putim bikpela mani long HIV na AIDS, tasol yumi nidim masin bilong helpim ol meri husat i gat kain dispela sik kensa i save kilim planti meri.

Long Fraide ol i bin toktok long wari na birua bilong ol meri olsem paitim meri na hevi bilong sampela man i save paulim ol liklik meri insait long famili yet.

Mausmeri Maggie Turwai bi-

long Hagen i bin tok olsem, 'Long ileksen mipela ol meri i mas i gat ples we mipela ol meri i ken givim vot. Pastaim planti meri long Hailans i no gat sans long vot, na em min olsem i no demokrasi. Na tu, sapos ol meri i kisim resevia long palimen, gavman mas putim inap baset mani tu bilong inapim wok bilong ol.

Tasfos Sweep bai sekim paul pasin long Helt dipatmen

Neville Choi i raitim

TASFOS Sweep, husat ol i wok long glasim na mekim wok painimaut long ol paul pasin insait long Nesenel Plening dipatmen, nau i kisim askim na tok orait bilong lukluk sekim ol paul pasin insait long helt dipatmen.

Minista bilong Helt, Jamie Maxtone-Graham, i bin askim Nesenel Eksekutiv Kaunsil bilong givim tok orait long tasfos long sekim helt administresen long kantri.

Sindaun bilong pablik helt sistem em i wanpela bikpela hevi tru long yumi.

Planti ol bikpela haus sik long Mosbi na ol provins, we gavman i mas strongim na lukautim, i wok

bungim planti kain kain hevi long marasin i sot, i nogat inap gutpela masin bilong sekim ol sikmanmeri, na planti arapela paul samting i stap.

Insait long sindaun bilong NEC long Septemba 14, ol i tok oraitim Investigesen Tasfos Sweep long wokbung wantaim ol intenal investigesen opisa i kam long Nesenel Dipatmen bilong Helt, we Ekting Helt sekreteri yet bai makim.

Wok bilong tasfos bai go het long sekim ol sut toktok olsem i gat bikpela paul pasin tru i wok kamap insait long helt dipatmen.

Dispela nupela wok painim bilong tasfos bai ron inap tupela mun, na em bai nidim K2 milian long kirapim. Helt dipatmen, aninit long oda bi-

long dispela NEC disisen, bai mas wok wantaim Dipatmen bilong Pesenol Menesmen long saspenim husat ol pablik sevan i gat nem pinis long ol wokpainim.

Dispela wok saspensen i kamap long las wik Fraide.

Tasfos Sweep Siaman, Sam Koim, i tok klia olsem wokmak bilong ol bai karamapim:

- Paulim bilong mani na ol samting bilong helt dipatmen;
- Paul pasin long baim na kisim bilong ol marasin, samting bilong mekim marasin, na ol arapela kain medikal saplai;
- Wok bilong ol provinsal haus sik na rurel etpos na helt senta. Olgeta ejensi bilong gavman

husat i wok bung wantaim long kamapim Investigesen Tasfos Sweep, bai mekim wankain long dispela wok painim long helt.

Siaman Koim i tromoi askim long pablik long husat manmeri i ting ol i ken halivim wok painim bilong tasfos long toktok wantaim ol tasfos opisa long:

Telepon 3211691 o 3412951, salim feks i go long 3211695 o 3259895. Ol i ken salim email i go long Investigation.taskforce@gmail.com. Sapos nogat email, yu ken salim pas i go long Investigation Task Force Sweep, P. O. Box 591, Waigani, NCD.

Maggi

Hariap Long Kukim, Gutpela Long Kaikai

Edukesen nogat luksave - Philemon



David Dop (lephan) na Emmanuel Ku, bilong Pagapena viles long Tambul, insait long Westen Hailans i poinim han i go daun long Wara Kagul long waswas. Tasol wanpela askim em olsem tupela i go long skul o nogat? Planti ol kain wan krismas bilong tupela i no save go long skul.

"50 pesen bilong ol skul sumatin i stap ausait na ol i kamapim 55 pesen long olgeta sumatin long kantri i no skul. "Dispela i soim olsem 3.4 milien bilong 6.5 milian pipel i no save rit na rait," em i tok. Em i tok dispela em wanpela bikpela hevi na antap long dispela, ol tisa i sot, haus i sot, nogat graun bilong skul, pawa na wara nogat, ol samting bilong tis i no stap, na planti ol narapela hevi i bungim dispela. "Ol dispela samting i kamapim hevi long edukesen bilong kantri, na mak o rot we ol inap long kisim long edukesen i no stap gut," em i tok.

Bustin Anzu i raitim
EDUKESAN sistem long kantri i no nogut long mak bilong en, na olgeta rot i poin long rong hap, Pablik Sevis Minista na Memba bilong Lae, Bart Philemon, i tok.

Em i tok sistem bilong edukesen nau i bagarap nogut tru na i no olsem long taim bilong kisim independens.

Em i mekim dispela toktok long taim bilong opim wanpela dabol klasrum long Amba Demonstresen Skul long Lae long las wik.

Em i tok em i raun long planti hap ples insait long Papua Niugini na lukim planti ol skul na gavman sevis i bagarap nogut tru na gavman bilong O'Neill-Namah i no inap pasim ai long dispela tasol traim na stretim ol dispela samting.

Tasol dispela ol samting i no bilong edukesen tasol.

Ol narapela gavman sevis olsem ol rot, bris, sip bris, ples balus, haus sik na ol narapela samting tu i bagarap.

Ol dispela samting i bagarap longpela taim i go pinis na ol i no stretim hariap.

Na em i tok ol pipel bilong dispela kantri na gavman i mas kisim tok

long dispela, long wanem, tupela wantaim i no bin lukautim ol dispela samting we gavman i kamapim bilong ol long yusim.

Na bikpela asua i mas stap wantaim gavman long wanem, planti bilong ol dispela disisen bilong ol em i no stret na em i rong.

Em i tok insait long 36 yia, gavman i yusim moa long K120 bilian long developim kantri, na insait long 9-pela yia, olpela gavman i yusim hap bilong dispela mani na insait long dispela, em i putim K1.5 bilian tasol bilong skul.

Dispela mani, em i tok em bilong elemerenti i go long gret 12, tasol lus tingting long ol koles, Yunivesiti na ol vokesenel skul long kantri.

Memba bilong Lae i tok dispela mani em Nesenel Gavman i givim, tasol i gat narapela helpim we i kam long ol dona o patna, we i bringim dispela mani i go antap long K2 bilian insait long las 9-pela yia.

Em i tok dispela em planti mani na planti skul insait long kantri i laik save dispela mani i kamapim wanem samting o ol i mekim long dispela mani.

Tupela Gabensis i dai bihain long pilai resis

Bustin Anzu i raitim

TUPELA man long ples Gabensis, long Huon Gulf distrik long Morobe, i bin dai long wiken, bihain long wanpela pilai i tanim go nogut na kamapim birua.

Nau yet, ol lidaman i paitim toktok i go kam long daunim dispela hevi. Ol rot sait maket long Nadzab i go long 40 mail i no op bihain long dispela birua na bihain long ol dispela bung, ol bai traim long opim bek ol dispela sevis.

Lidaman long ples Gabsongkec, Justin Hiob, i tok ol lidaman long ples Gabsongkec, Nasuapum, Nadzab, Tanam, 40 mail na Tararan, olgeta insait long Wampar Lokol Level Gavman (LLG) bai bung long stretim dispela hevi bilong Gabensis na 40-mail.

Hiob i tok dispela hevi i kamap long wiken tasol, na em i laik bagarapim gutpela sindaun bilong ol long ples, na ol lida bai bung long stretim dispela hevi.

Dispela hevi i bin kamap bihain long sampela pilai olsem soka, volibol, basketbol na ragbi tas i kamap long Idzum Putsing pilai graun, klostu long Wampar gavman stesin, long Wampar LLG.

Tupela tim bilong Gabensis na 40 mail i stap insait long dispela fainol na klostu long fultaim bilong soka, tupela tim i kamapim dispela pait na tupela man long Gabensis i dai.

Long Mande nait, ol lain Gabensis i kisim kar na laik go long ples Gabsongkec na ol narapela ples klostu long Nadzab ples balus na bagarapim ol, tasol ol polis i stopim ol na rausim ol long Markham Bris na rausim ol na salim ol i go bek long ples bilong ol.

Ol ogenaia bilong dispela pilai i no ting olsem kain hevi bai kamap na ol i no pinisim ol fainol gut na givim aut prais.

TELI Apdeit

Citifon Mobail Sevis

Citifon, nupela stail mobail sevis Telikom PNG i kisim i kam long kantri i mekim ol yangpela i wok singaut 'YELLO' o singsing 'YELLO' long olgeta hap kona kantri.

Kala bilong em i brait yelo, na em i ron antap long 3G waiates CDMA network we kavares i bin go aut long moa long 5,000 komyuniti long kantri. Salim bilong faivpela kain hanset i go het long ol senta long kantri. Salim bilong Citifon i go het pinis long Kokopo na ol arapela provins long Niugini Ailans.

Ol Citifon Ret

Yu ken mekim kol i go long wanem hap bilong kantri o ringim ol poro na famili i stap ovasis. Samting we i mekim planti i laikim Citifon, em ol namba wan kol ret long wanem kain taim bilong de. Em i 2 toea tasol long wan wan minit, na 1 toea sms bilong Citifon i go long Citifon, na wanpela Citifon kol i go long Digicel o bemobile em ol i sasim long 39 toea long wan minit na 10 toea sms.

Konek long Intanet

Ol dispela hanset, we ol i ken mekim vois kol, em yu ken yusim tu long konek i go long intanet long leptop o PC. Ol kastoma i ken amamas long ol gutpela pripet ret long 29 toea long wan Mb olgeta de na nait.

Risasim ol Fon Kredit

Yu mas yusim Rait Pripet kat o Telikad bilong risasim Citifon kredit bilong yu. Long risasim, dailim 1255, na bihainim ol tok stia bai kamap. Ol kastoma i ken salim kredit long wanpela Citifon i go long narapela Citifon. Long mekim dispela, dailim 1255 na bihainim opsen 3 long salim kredit.

Ol Veliu-Edet Sevis

•Citifon i gat ofa olsem wanpela gutpela sevis bilong sms benking, we ol kastoma i ken rejista long wanem ol Telikom bisnis opis o BSP brens.


•Yu ken harim musik tu long Musik Sanel we i gat Top 20 wikli hit lis bilong FM100. Dailim 127 bilong kisim Musik Sanel.

•Sapos yu lus tingting long Citifon namba bilong yu, noken wari moa. Dailim 1251 tasol na yu ken kisim Citifon namba na kredit balens bilong yu.

Kastoma Kea

Long painimaut moa, ringim 24/7 Kastoma Kea hotlain bilong Telikom long 3456789.

Ol Papua Niugini stret... I Save tok YELLO wantaim Citifon.



Em Isi tru long Kisim Fres Prodius Maket Infomesin wantaim ol Digicel Fon

Fres Kaikain	Kod	Yunit
Avokado	AVO	kg
Snek Bir/Frens POM	BEAN	k
Brokoli	BROC	kg
Kabis	CAB	kg
Kerot	CAR	kg
Galik	GAR	Kg
Onion	ONN	Kg
Orens	ORA	Kg
Painapol	PINE	kg
Poteto	POT	kg
Swit Poteto (kaukau)	SPOT	kg

Ol famas na lain bilong baim fres kaikai bai isi tru nau long kisim maket infomesin long ol fres kaikai taim ol i yusim wanpela Digicel mobail fon. Bihainim ol dispela isi rot tasol:

- Presim na raitim kod bilong fres kaikai na larim wanpela spes i stap
- Presim na raitim daun veriable (prais, saplai o kwaliti)
- Presim SEND igo long 4636
- Wanpela text mesej i soim wanem maket infomesin yu laikim bilong ol 8-pela bikpela maket long PNG

Variable
Prais
Saplai
Kwaliti

Mekim gutpela Prodaksin na Maket Disisen long ol frut na fres gaden kaikai bilong yu

Wantaim maket infomesin i stap pinis, em i ken halivim yu long mekim disisen long wanem kaikai bai yu groim long gaden na kisim, hamas long groim, wanem hap long salim, wanem kaikai na ples bai yu baim.

Long kisim moa infomesin, ringim Help Desk long 72784968/726240973050007/7313059/72635282

Wanpela Gutpela wok helpim em Fres Prodius Developmen Ejensi, Digicel na AusAID i bringim kamap.

145,000 sumatin long kantri i sindaun long fainol tes

Gavman bilong Japan helpim

NAMEL long las wik na stat long mun Novemba, klostu hap milion sumatin long Gret 8, 10 na 12 long kantri bai sindaun long ol laspela bikipela tes bilong ol.

Ekting Edukesen sekreteri, Dokta Joseph Pagelio, i tok 145,000 sumatin bai sindaun long besik Edukesen setifiket (Gret 8), Lowa Sekonderi (Gret 10) na Apa Sekonderi (Gret 12) setifiket bilong ol.

Ol Gret 10 i sindaun long

tupela wik tes bilong ol we i pinis long tumora, Fraide. Tes i bin stat long Tunde Oktoba 4 we wan wan sumatin i wokim tes long 7-pela sabjek.

Ol Gret 12 sumatin bai statim tes bilong ol long neks wik Mande Oktoba 17 na skruim i go gen long tupela wik inap long Fraide Oktoba 28. Ol bai sindaun long 5-pela sabjek.

Las em ol Gret 8 sumatin husat bai sindaun long 4-pela de tes, stat long Mande

Oktoba 31 inap long Fonde, Novemba 3.

Dokta Pagelio i askim olgeta lain i save sapotim edukesen, ol papamama, ol was papamama na jenerel pablik long givim gutpela sapot na noken wokim trabel we bai bagarapim ol sumatin i sindaun long ol fainol tes bilong ol.

Em i tok dispela ol tes em ol bikipela samting bikos ol i hap bilong skelim na glasim kwali-

fikesen sistem ol skul i save yusim long lukim olsem kwaliti lainim na tising long nesene edukesne sistem i go het.

Taim em i tok i gat ol arapela rot we ol sumatin i ken bihainim sapos ol i no mekim gut long dispela sistem, em i askim ol papamama na ol was papamama long redim na sapotim gut ol pikinini taim ol i sindaun long ol tes bilong ol.

OL SUMATIN na tisa insait long tupela skul insait long Westen Hailans provins i ken sindaun gut na kisim lainim na dispela i kamap wantaim helpim bilong gavman bilong Japan .

Anglimp Komyuniti skul na Kwip Priameri skul long Mul-Bayer Lumusa long Westen Hailans i bin opim tripela nupela dabel klasrum bilding tupela wik i go pinis we gavman bilong Japan i bin helpim ol wantaim manimak inap long K408,238.05 (US\$163,294).

Embaseda bilong Japan long PNG, Hiroharu Iwasaki, taim em i opim ol nupela klasrum bilding i bin tok amamas long tupela skul long sanapim ol klasrum, na tokim ol long lukautim ol gut long ol lain i kam bihain i ken yusim long kisim save long ol.

Em bin skruim tok i go moa na tok dispela projek bai strongim prenpasin na wok patna i stap namel long Japan na PNG long planti yia nau.

Aninit long Gren Asisten long Grasrut Humen Sekyuriti projek, Embasi bilong Japan i bin givim tupela skul gren man i inap long K408,238.05 (US\$163,294) bilong bildim tripela dabel klasrum na moa pikinini inap go long skul.

Na nau, ol sumatin i ken sindaun long ol nupela na gutpela klasrum na kisim gutpela lainim

taim ol tisa tu nau i ken gat spes nap les bilong sindaun na karimaut gut ol wok bilong ol.



LAINIM:Daure Joe na Kauna Eric bilong Baruni Elementeri skul ausait long Mosbi siti i lain long 12-pela bokis buk we Telikom Faundesen i bin givimwik Mande. Foto: Telikom PNG Media

Telikom Faundesen helpim Baruni skul

OL SUMATIN na tisa Baruni Elementeri skul ausait tasol long Mosbi long dispela wik i laki tru long kisim 12-pela katen skul buk na tupela X-ses wailes telepon i kam long Telikom Faundesen.

Het mistres bilong skul, Irene Gaudi, taim em i tok tenkyu long faundesen long ol samting ya i bin tok ol dispela

buk bai helpim gut ol sumatin long rit long wanem, ol sumatin i gat hevi long pasin bilong rit long skul, na skul laibreri i nogat inap laibreri buk long olgeta sumatin i ken lainim long ol.

Em i tok tu olsem tupela nupela telepon bai helpim ol long sait bilong komyunikesen long karimaut ol wok

bilong lukim olsem ol operesen bilong skul i ron gut.

Sif Eksekutiv opisa bilong Telikom Brian Sam, i tok Telikom Faundesen i bilip olsem sapotim gut lainim bilong ol pikinini em i bikipela samting long kantri i ken kamap gut long bihain taim.

Nupela rot long femili plening nau i stap long PNG

NUPELA rot long femili plening we ol mama long PNG i ken bihainim i stap nau long ol Marie Stopes PNG klinik bilong em long kantri.

Ol i kolim dispela nupela femili plening rot long "Contraceptive Implants" we ol mama i ken kisim long Marie Stopes klinik long Mosbi, Lae, Hagen na Goroka.

Opis bilong Marie Stopes long Mosbi taim em i tokaut long dispela nupela rot, i tok dispela "Contraceptive Implants" i gat long em tupela liklik plastik stik ol i putim aninit long skin bilong han bilong meri na i ken stap long 4-pela yia.

Opis i tok rot we dispela femili plening plastik stik i wok long en em i save autim ol "hormone progestine" o wara i save banisim kiau long bilum bilong meri i no inap larim kiau bilong man i go bungim na wokim pikinini.

Opis i tok dispela femili plening rot i gutpela moa long ol narapela na i wok gut na tu, ol meri i no inap bungim bagarap o sik.

Opis i tok em i mekim wankain wok olsem pil o marasin ol meri i stap long femili plening i save kisim olgeta de, banis sut tasol ol i no inap long kisim olgeta de.

Opis i tok em i isi long long putim dispela tupela plastik stik i go insait long skin bilong ol mama na meri.

Menesa bilong Mosbi Marie Stopes senta, Sister Lista Dembis, i tok long ol bekim ol i kisim long ol wok awenes ol i karimaut, dispela rot bilong femili plening em i gutpela moa na planti mama bai kisim.

Opis i tok Marie Stopes PNG i amamas olsem em i namba wan helt ogenaisesen long givim dispela nupela rot i kam long kantri.

Em i tok dispela rot bai givim moa sans long kwaliti femili plening, seksuel na riprodaktiv helt sevis.



TRAIM: Sister Lista Dembis- Mosbi senta, Sister Lucy Mahab - Goroka senta, Sister Nidillie Vevesong - Lae senta, Sister Therese Taku- Pot Mosbi Jenerel Haus sik, Sister Lulu Pwaka- Medivac na Dokta Anna Colwell, volanti dokta, long trening taim bilong ol. Foto: MSPNG



Yut, Meri na Famili wantaim Lorraine Siraba

Moa toktok long ol pikinini bilong rot

LONG las tupela wik, mi serim ol samting i karamapim groa bilong populesen olsem hap bilong wol 7 milien kempen long givim awenes long populesen bilong wol, we bai inapim 7 bilien long dispela mun.

Las wik, mi bin serim tingting bilong wampela yangpela man husat i bin tok strong long ol marit lain long strongim ol yet na plenim ol famili bilong ol, hamas pikinini ol bai gat na sapos ol i gat inap mani, taim na risos long lukautim ol.

Rusel i bin wampela long 6-pela pikinini husat i bin painim rot long lukautim em yet long strit o rot bikos planti lain tru long lukautim na givim ol kaikai insait long famili.

Long dispela wik, mi laik serim wantaim yu sampela ol painim long wampela risets ol bin lon-sim long Komyuniti Developmen Dipatmen i no long taim i go pinis.

Pikinini bilong rot i wok long kamap olsem wampela wari long PNG nau.

Wok painim i soim olsem planti ol pikinini bilong rot em ol manki man we krismas bilong ol i 18 yia na daunbilo. Yu ken painim ol long ol bikpela taun na siti Mosbi, Lae, Kokopo, Simbu, Goroka, Hagen na Wewak. I gat ol pikinini bilong rot long ol narapela senta, tasol ol risets lain i no bin raun i go long ol narapela taun na provins. Ol bin go tasol long 7-pela taun antap ya.

Risets i soim yumi olsem ol pikinini bilong rot i save wok long ol eria olsem wokim pamuk pasin, plantesen, stoa, salim ol samting long strit o rot, ples ol i sanapim ol kar long ol stoa na supamakot, wet long ol sait rot long askim long mani na tu, sampela i wokim kriminel na stil pasin. Ol i kolim ol dispela lain ol turangu long ol eben eria o long ol taun na siti na ol i go insait long infomol sekta long traim painim mani na lukautim ol yet long ol taun, siti na ol ples we ol bikpela kampani i stap long en.

Sampela ol samting we risets i painim i mekim ol pikinini i go stap long rot em, mekim nogut long ol pikinini, domestik vailens o sindaun bilong papamama i no gutpela na papa i paitim mama tumas, divos o wampela i dai, no givim gutpela lukaut, lusim skul bikos nogat skul fi na nogat inap kaikai long haus.

Risets i kirap nogut long painim olsem planti ol pikinini bilong rot i save stap long haus wantaim ol papamama, tasol ol i ronawe bikos stap long haus wantaim ol papamama i no gutpela.

Wampela long ol pikinini we risets lain i bin kisim ol toktok long en em, i tok ol strit pikinini i nogat wampela gutpela samting long givim o mekim bikos ol no kisim gutpela sapot i kam long ol papamama.

Em bin tok em i no laik bilong em long lusim haus, tasol bikos i gat planti pikinini tumas long haus na papamama i bisi long lukautim ol narapela. Na em i go long rot bikos em ken stap wantaim ol narapela pikinini bilong rot. (pikinini man long Rabaul i gat 18 krismas) i tok.

Narapela manki man i mekim wankain toktok. Em tu i kam long famili i gat planti pikinini na em i lusim haus na i go aut long lukautim em yet.

Nek bilong ol yangpela pipel i tok ol i painim hat tru long laip em i trupela samting. Yumi mas harim na mekim olsem yumi plenim na laikim narapela pikinini yumi karim i kam long dispela graun.



HELPIM BILONG KAMAPIM SENIS: Ledi Winifred Kamit (namba 2 long rait) long prisentesen bilong ol bilas bilong han (wrist bands) na ol lain bilong CFCPNG na Media Patnas.



PNG SUSTAINABLE DEVELOPMENT PROGRAM LTD



Ol Welpam Smolholda long tupela provins i lukim kaikai bilong Smolholda Agrikalsa Developmen Projek (SADP)

PNGSDP i wokbung wantaim ol Welpam Smolholda insait long Oro na Wes Nu Briten provins, Wol Benk (World Bank WB), Gavman bilong PNG, New Britain Palm Oil Ltd, Hargy Oil Palm Ltd, PNG Oil Palm Research Association, na Oil Palm Industri Koporesen long karimaut SADP insait long ol projek eria bilong Popondeta, Hoskins, na Biiala.

Rot em i bikpela samting long smolholda sekta, tasol planti taim, i nogat gutpela wok lukautim. Aninit long SADP, inap long 550 kilomita long ol fida rot bai kisim wok stretim. Astingting em bilong bringim rot netwok i kamap long mak we i ken lukautim em yet. Olgeta blok holda insait long dispela tripela smolholda skim i winim 16,000, na planti long ol i gat ol bikpela famili husat i save sindaun long winmani bilong welpam tasol.

Projek bai kisim olgeta ol industri stekholda long wokim gutpela wok rot mentenens o stretim. Bikpela manimak bilong projek i sanap olsem \$US11.0m taim projek i kisim wok skelim. Ol winmani i go long ol smolholda fama bai go antap long K25m olgeta yia bihain long tenpela yia.

PNGSDP i mekim wampela bikpela kontribusen long dispela US\$68.8m projek.

Long 2009/2010 long taim namba wan SADP statim wok i kirap, mipela i givim K2.0m, na ol enjiniaring saveman i go stretim rot long ol ples i kisim bagarap long Saiklon Guba. Dispela wok i lukim 27 kalvet o rot baret na wet krosing long sanapim bek rot i go long ol welpam growas husat haiwara i bin pasim ol.

PNGSDP i skelim US\$2.9m i go long konstraksen na apgredim bilong 105 kilomita bilong ol welpam fida rot insait long Oro Provins. Dispela em i wampela spesol hap bilong projek long silipim rot bilong 500 ol smolholda famili. Ol dispela fama i wok painim hat tru long rausim prut bilong ol bikos i nogat gutpela rot.

PNGSDP i wok long yusim PNG Maikrofainens Limitet (PNG Microfinance Ltd) long givim ol loun o dinau i go long samting olsem 4000 nupela smolholda. Kontribusen bilong mipela inapim K8.9m, na bai go long baim ol sidling na ol arapela samting. Namel long tupela na tripela yia, ol nupela growa bai go het long bekim bek ol dinau wantaim winmani bilong welpam. Long ol prais bilong welpam tude, wampela smolholda husat i hatwok i ken mekim samting olsem K10,000 long wampela yia long wampela tu hekta blok welpam. Mak bilong bekim dinau ol i save kaunim olsem 30% olgeta potnait. Olsem na sapos prais bilong welpam i go daun, ol bekim bek dinau mak bai go daun tu.

PNGSDP i makim tu US\$1.1m olsem mani bilong wampela tras fan bilong rot mentenens o stretim. Sapos tok wanbel i kamap wantaim olgeta ol stekholda, dispela fan bai sanap bilong peim wok rot stretim, longpela taim yet bihain long SADP projek o pas. Bilip i stap olsem ol stekholda bai kontribut long fan taim ol i amamas long moa welpam prodaksen na sapos trenspot kos i go daun long gutpela rot mentenens.

Strong bilong SADP bai bihainim mak bilong groa bilong winmani bilong ol smolholda. Moa prut, mobeta trenspot na rot, long manimak o kostim we i no antap tumas, bai wampela bikpela kaikai bilong dispela projek.

I kam long CEO (Article #14 of 2011)



CEO: David Sode

Strongim wok bilong ol meri long Kurumbukari

PASTAIM tru planti ol meri na yangpela meri long Papua Niugini i save painim hat tru long brukim kastom we i stap olsem man em bos bilong planti samting insait longpasin kastom bilong yumi long Melanesia.

Wankain pasin tu i stap long ol eria we Ramu NiCo Projek long Madang provins i stap long en.

Wanpela meri bilong Kurumbukari eria we bikpela projek i stap long en nem bilong em, Agatha Yomba, tu i bungim wantaim pasin long pastaim.

Tasol nau Agatha i tokaut olsem planti gutpela senis i wok long kamap bihain long Ramu NiCo project i go insait long eria bilong ol.

Agatha i wok olsem Jenda Opisa wantaim Ramu NiCo Projek long taim wok i kirap long Oktoba 29, 2007 aninit long Komyuniti Afes Dipatmen.

Bikpela wok bilong Agatha em long karimaut ol progrem bilong Ramu NiCo long skulim ol meri, olsem ol mama na ol yangpela meri long kamapim gutpela sindaun na developmen long komyuniti ol i stap long en.

“Long pastaim, ol yangpela meri i save painim hat long go



Agatha Yomba, asples meri bilong Kurumbukari (KBK) yet i wok olsem Jenda Opisa bilong Ramu NiCo Projek.

long skul. Ol papapamama i ting olsem ol i westim mani olsem na ol i save larim ol meri i stap tasol long ples na mekim wok o redim tasol ol pikinini meri bilong ol long marit na lukautim ples,” Agatha i tok.

Tasol nau, Agatha i amamas long tok olsem dispela pasin i wok long senis insait long sotpela taim Ramu NiCo i go insait long Madang long ol ples olsem KBK na Basamuk.

Olsem wanpelal asples meri, Agatha i save skulim o givim trening long ol meri long eria bilong em long save gut long ol rait bilong ol long muv i go fowat long bungim wanem olsem ol senis i kamap long wol na tu developmen.

Insait long CA Jenda opis, wok bilong Agatha em long glasim wanem ol samting ol meri i mas mekim long senisim na kamapim gutpela sindaun bilong ol long

ples. Dispela program em Ramu NiCo Projek i putim mani long kamapim.

“Mipela i save tok tok na givim skul long ol meri long sait bilong stopim na daunim hevi bilong man i paitim meri (violence against women), welfea bilong ol meri na pikinini, trening na stropim wok bilong ol meri, skills o givim trening long wanem wok ol meri i ken wokim, baset, wok bisnis, buk-kipling, lukluk long marit na sindaun bilong ol meri wantaim femili long bihain,skulim ol meri long abrusim pasin bilong kisim bel nating, helt na mekim ples klin na ol arapela samting,” Agatha i tok.

“Mipela i skulim ol tu long raits bilong ol long vot na tu mipela i skulim ol long statim wimens asosenen long lukluk long ol hevi bilong ol meri,” em i tok.

Agatha i stori olsem insait long KBK long pastaim i lukim samting olsem 99-pesen long ol meri i no save go long skul. Tasol stat long

2007 i kam inap inap nau, planti ol gutpela senis tru i kamap we i lukim ol meri na mama i sanap strong long kisim skul na trening long helpim ples na komyuniti bilong ol.

Agatha i wok klostu wantaim narapela local meri nem bilong em Anna Kuwiza. Ol i save wokim ol plen na program bilong ol long mekim wok stat long KBK i go olgeta long Basamuk rifa faineri. Dispela i karamapim tu ol paipain eria. Tupela i mekim bikpela wok tru long CA Dipatmen bilong Ramu NiCo Projek bikos ol lokal meri na save gut long pasin na laipstail bilong ol pipel.

“Wok bilong mipela i pas tru wantaim ol meri na yut bikos ol dispel lain em ol bikpela samting tru long sosaiti o komyuniti, bikos ol dispela i ken holim strong sosaiti na komyuniti insait long eria we wok maining i stap long en,” Agatha i tok.

Em i tok olsem taim em i lukim ol gutpela wok developmen i kamap long laip bilong ol manmeri na wanem wok i kamap long daunim ol salens em i save amamas.

CFCPNG kisim helpim long kamapim senis

INSAIT long PNG tude, ol wok awenes i kamap long daunim na stopim pasin bilong bagarapim na paitim ol meri na pikinini.

Dispela em bikos long wol na Pasifik rijen, PNG i gat piksa nogut we pasin bilong bagarapim na paitim meri i kamap bikpela tru.

Wanpela ogenaesenen we i wok long laik kamapim sampela senis long dispela pasin na tu, sapotim ol pikinini meri long mekim samting long lukautim ol yet em, Koalisen bilong Senis (Coalition for Change) PNG Limitet (CFCPNG).

CFCPNG i wanpela ogenaesenen i no wokim winmani, tasol em i wok long kamapim senis long kain stap we PNG i stap long en. Em i wok long ol level olsem politikel, bisnis na komyuniti level long bringim dispela senis.

Long las wik Fraide, CFCPNG i bin kisim 300 “wrist bands” o bilas long han i kam long Midia Patnas Limitit long sapotim Wait Riben De i wok long kamap klostu nau.

long strongim awenes bilong daunim vailens egensim ol meri na pikinini.

Pauline Julius i makim Media Patnas kampani i tok ogenaesenen bilong em i givim sapot i go long ol ogenaesenen i wok long kamapim senis insait long sosaiti yumi stap long en, na ol bai wok wantaim CFCPNG long kamapim dispela senis.

Ledi Winifred Kamit em siapesen bilong CFCPNG, taim em i tok tenkyu i go long Media Patnas long donesen bilong ol, em bin tok ol bai wok bung wantaim Media patnas long kisim ol toktok bilong ol i go aut long pablik.

Em bin tok ol bai salim ol “wrist band” long kamapim mani long Waitpela Riben de we bai kam p klostu taim.

Sapos sampela lain i laik sapotim CFCPNG lon g wok bilong em, kontek bilong ol em:

Telepon Namba-3241807/3462304. Feks: 3255503. Postel Edres: P O Box 6539, Boroko, NCD o Email Edres: emcf@cfcpng.org.com

Raun Lukim ol Meri na Pikinini...



BEREINA LAIN: Sampela ol mama na pikinini ausait long Sekret Hat Katitrel long Bereina stesen bihain long misa lotu.

Poto: Veronica Hatutasi



HMM... NAIS! I gat rot long lainim ol purpur na i luknais stret, olsem dispela we mama ya i lainim ol yangpela man na meri long lainim gut ol okid na helekonia purpur.



WOL WOA 2 BANKA: Tupela mama na pikinini i sanap ausait long wanpela Wol Woa 2 Banka bilong ol Siapan (Japan) long Hahela Katolik Misin stesen, Buka Ailan. Poto: Veronica Hatutasi



STON i KEN PULIM MANI: Tupela mama bilong Tinputz long Otonomes Rijen bilong Bogenvil wantaim ol naispela ston bilong salim long helpim fan resing bilong ol. Poto: Veronica Hatutasi

Mendi Daiosis opim ol nupela skul bilding na haus slip

Pater Pius bilong Mendi Daiosis i raitim

KATOLIK Daiosis bilong Mendi i bin lukim olsem moa long 1000 manmeri i bin kam long opim bilong nupela klasrum, ol haus bilong tisa, tupela haus slip bilong ol sumatin man na meri na ol arapela samting bilong Komyuniti Helt Woka Trening Skul.

Ol manmeri i kam wantaim kain kain bilas bilong ol na mekim Daiosis bilong Mendi i luk naispela tru. Planti lain manmeri bilong Hagen, Simbu, na Wabag na ol arapela hailans na bikples rijen i bin kam na lukim dispela opening i kamap.

Dispela skul i bin stat long yia 1974 long Det Peris insait long Mendi Daiosis.

Sister Gaudentia bilong kantri Swiselan husat i mama bilong dispela skul i bin statim dispela skul taim em i yangpela sista yet. Dispela taim, 6- pela sumatin tasol i bin stap long skul.

Dispela skul i bin stap long Det Peris inap long yia 1986. Long 1987, pait i bin kamap long Det Peris na ol i bin pasim skul. Long yia 1988, ol i bin bringim dispela skul i kam long Kumin (Mendi Daiosis) wantaim helpim bilong bisop bilong Mendi.

Nau Asbisop bilong Madang husat i bin bisop bilong Mendi, Asbisop Steven i bin kam long blesim dispela skul.

Asbisop Steven i bin tok tenk yu long ol lain husat i bin givim helpim long kamapim ol klasrum, ol haus slip bilong ol sumatin, haus tisa na ol narapela samting long dispela skul.

Em i bin tenkim tu ol lain bilong PNG Sustainable Development Program long helpim bilong ol wantaim K250,000. 00 long kamapim klasrum.

Moa yet, em i tenkim Oil Search long helpim bilong ol wantaim K3 milion long



PNG SAS-TENEBOL GIVIM BIKPELA SAPOT: Asbisop Steven Reichert i sindaun wantaim menesa bilong Komyuniti Rilesen bilong PNG Sastenebol Developmen, Lawrence Stevens long opening sere-moni.



kamapim ol haus slip, sewes ol toilet sistem, tenk wara, wara sistem na ol arapela samting.

Em i tenkim tu ol lain husat i save wok wantaim Katolik Helt Sevis na ol lain bilong narapela kantri long helpim bilong ol long kamapim ol bilding bilong dispela skul.

Minista bilong Woks na memba bilong Imbongu Open Iktoret, Francis Awesa, i bin amamas long dispela skul i kamap long elektoret bilong em, na em i helpim skul wantaim K10,000. 00 long baim ol nara-

pela samting skul i nidim.

Na tu, em i tok em bai putim kolta long rot i go insait long skul na long misin eria bilong Mendi Daiosis. Administreta bilong em, Alen Kaiyabe, i tok yumi ol manmeri i mas lukautim gut ol gutpela samting i wok long kamap long hap bilong yumi.

Em i tok moa olsem, em i moa gutpela sapos yumi senisim krangki tingting na pasin bilong yumi na lukautim ol dispela gutpela samting i wok long kamap long ples bilong yumi.

Het Tisa bilong dispela skul,

OPIM NAU: Asbisop Steven Reichert, pas-taim bisop bilong Mendi Katolik Daiosis tasol nau, em i asbisop bilong Madang Asdaosis, i katim riben long opim ol nupela klasrum na haus tisa bilong ol Komyuniti Helt Woka trenin g skul long Mendi, Sauten Hailans

Cathy Pilang, i bin tok bikpela tenkyu long helpim bilong Asbisop Steven husat i bin stap bisop bilong Mendi Daiosis long kamapim dispela skul.

Em i tok tu olsem, bipo ol i save kisim 20-pela sumatin long wan wan yia tasol stat long narapela yia 2012, ol bai kisim moa long 60 sumatin.

Ol lain husat i bin givim helpim long kamapim dispela skul i kam stap long dispela opening. Ol i amamas long lukim helpim bilong ol i no lus nating, tasol i karim gutpela kaikai.

Lukautim gut ol samting Bikman i putim long dispela graun

PAPA God i putim man long lukautim na bosim ol samting em i mekim long dispela graun, Pasto Kelly Lomon, i wokim dispela toktok long opim tripela de long tripela de woksop bilong Manus Komyuniti Netwok (CEN) we NGO, Seaweb Intanesenel, i bin ranim long ples Kolwin, Manus provins.

Pasto Lomon i tok God i bin mekim man long lukautim na bosim ol samting em i mekim long dispela graun, tasol ol samting em i mekim na i no mekim tu, i bagarapim samt-

ing we God yet i wokim na tok," em i gutpela."

"God i mekim olgeta samting em i wokim na tru tumas, em i gutpela stret," em i ritim dispela hap Baibel toktok long Genesis 1:31 an i skruim tok moa olsem "as tingting hia em long lukluk long ol rot bilong lukautim ol dispela gutpela samting."

Pasto Lomon i tok toktok bilong em long dispela woksop i no bilong helpim man i painim ansa long ol hevi em i gat long envaironmen o bus graun na solwara, ol pisin i plai i stap, ol kau, pik na olgeta samting i stap long dispela graun."

insait na ausait, tasol i bilong mekim ol i tingim olsem em i wok bilong man long menesim na yusim gut ol risos we i blesing em i givim long en. Na em i ken lukautim, olsem tasol God i mekim long en.

Em i sapotim singaut bilong em wantaim toktok i kam long Genesis 1:26, "Na God i tok, yumi mekim man long piksa bilong yumi, na larim em i bosim ol pis long solwara, ol pisin i plai i stap, ol kau, pik na olgeta samting i stap long dispela graun."

Pasto Lomon i wanpela leksera long Maria Molna Baibel

Kolis long Lugos, i bin tokim ol lain long woksop long kamap ol gutpela lukaut papa long ol samting God i wokim. Na em i tokim CEN long kamap olsem nek bilong tokim ol manmeri i mas lukautim gut ol samting we God i mekim na putim long dispela graun.

"Kain lidasip we God i laikim, olsem i stap long Buk Baibel, i no stap," Pasto Lomon i tok.

Em i salensim ol lain i sindaun long woksop long go pas long lukautim gut ol samting olsem Bikman yet i laikim man long mekim.

GLASIM TOK
WANTAIM
Fr Lollington Wiam

Mani na God

LONG dispela wik Sande, Matyu 22:15 - 22 i stori long mani na God.

Yumi lukim gut tru bai yumi glasim olsem ol Herodians em ol sapota bilong ol Farisi na em ol lei lida bilong ol Jew pipel.

Ol i save bihainim gut tru ol Komanmen na ol Loa. Ol i bin yusim ol kain switpela toktok bilong salensim Jisas bai em givim tingting bilong em olsem wanem long piksa i stap long koin mani. Hevi em mani.

Israel em i agrikalna ples na i gat takis long em. Long dispela as tingting tasol, ol Roman gavman i kisim sensis na kauntim namba bilong man long putim takis.

Tasol bikpela samting em, ol Israel i lain bilong lotu na luksave long God i bikpela moa antap long olgeta samting.

Olsem na long baim takis long Roman koin i gat tripela kain hevi na ol i les long peim takis. Israel i save belhat long ol narapela lain i bosim ol, na piksa i stap antap long koin ol i lukim olsem ol i lotu long ol giaman God na brukim loa em bikpela hevi (Exodus 20: 4-6). Olsem na sapos Jisas i sapotim peim takis bai ol lida man i tok baksait long em. Na sapos em i agensim ol, em i trabel man agensim ol.

Olsem na ansa bilong Jisas i olsem; dispela koin mani em propeti o samting bilong lidaman long gavman bilong ol Rom, em "Ceasar" o Sisa we koin i karim nem bilong em.

Olsem na em i bilong em na ol i mas givim i go long em. Ol i mas givim i go bek long em wanem samting em bilong en. Tasol narapela samting em "wanem samting em bilong God, givim i go long God."

God i mas kisim mak bilong em. Dispela i no limited takis bil, nogat. Em komplit open sek.

Dispela em wanpela rot na we tasol long bekim gutpela lukaut bilong Papa God taim yumi lotuim em, lav na sevis wantaim tingting na lewa bilong wanwan manmeri.

Tok bilong God i stap olsem. Hamas yu kisim, wan ten em yumi must givim i go bek long God. Dispela i mekim mi tingting, hamas ol politisen i go long sios na givim wan ten long God. gavman bilong PNG taim em brukim baset, i save givim wan tent long God o nogat.

Tru, gavman bilong PNG i save tingim sios na ol sosel sevis, tasol, olsem wanem long wokfos bilong sios bilong God.

Sapos gavman bilong yumi na ol bikman long dipatmen, ol loya na jas i komitim wan ten o 10 pesen bilong ol long sios wokfos, bai yumi lukim bilip na pasin kristen long luksave long God bai kamap 100% long wol reiting o mak.

Ol biklain na gavman bilong yumi i no luksave long dispela rot bilong God, olsem na yumi het manmeri bilong sios i fosim ol kristen manmeri long wanwan sios long givim wan ten na paulim ol long bilip na laip bilong ol yet long God.

Bikpela samting Jisas i laikim yumi long givim long God em, laip bilong yumi olgeta, komitmen, lotuim em, lav na sevis.

Olsem na dispela hap tok gavman bilong yumi i mas glasim gut. Hamas blesim em i kisim, em i mas lain long givim wan ten o hap mani long God long sios bilong em.

I Wol Nius long Poto...



Ol protesta i bung gen agensim pasim bilong piseris risets
 OL protesta i givim wanpela petisen i kam long Sevim Cronulla Piseris Risets Senta agensim pasim bilong senta, i go long Mark Speakman long NSW Palamen long Sydney, long Tunde, Oktoba 11. Long mun Septemba, 150 wokmanmeri long risets opis i kisim toksave olsem ol bai go wok long ol ijenal eria bihainim wanpela disisen we Praimeris Indastris Minista, Katrina Hodgkinson i mekim.

Karim kofin bokis

OL Isip (Egypt) Kop-tik Katolik bilipman i karim kofin bokis bilong wanpela i dai long pait. Oli i kisim em i go long planim em long Abassaiya Katitrel (hauslotu) long Kairo (Cairo) long Mande. Wanpela de bihain long 24 pipel, planti long ol em ol Kristen, i dai insait long ol pait wantaim ol sekyuriti fos bilong Isip.



Ol i mas: OL Kristen bilong Isip i mas long Kairo long wanpela protes agensim birua i kamap long wanpela sios long Sauten Isip.



Pait na paia: WANPELA protesta i sanap klostu long bikpela paia i bruk long wanpela pait long Kairo long Sande. Naintin (19) manmeri i bin lusim laip bilong ol long Kairo taim ol Kristen, sampela i karim kruse, na piksa bilong Jisas, i pait wantaim ol mitari polis.



WANTOK

KOMENTRI

Busgraun banis bai sanap strong gen

TAIM olpela gavman bilong Sir Michael Somare i bin bungim hevi bilong ol papagraun long Madang i kisim kot tok orait long pasim ron na kirap bilong bikpela Ramu Nikel Main projek, ol i mekim samting we i bin daunim tru bilip bilong ol pipel long en.

Taim kot i bin tok orait long krai bilong ol papagraun long Madang, wok long projek i no go het.

Bikpela birua na belwari bilong ol asples papagraun long Madang, em bagarap ol pipia bilong dispela wok maining i ken kamapim long solwara na nambis bilong ol.

Olpela envaironmen minista, Benny Allen i bin strongim tru kona bilong em olsem envaironmen ekt o loa i no bin strong inap, na i bin opim rot long ol bikpela risos projek long pundaun.

Gavman bilong Somare i bin belwari tru long dispela.

Taim Allen i bin traim tanim tingting bilong ol asples, i nogat bekim i kam long ol papagraun.

Kain kain pasin pretim na tok lukaut i bin kamap long ol papagraun husat i tingim busgraun bilong ol.

Olpela gavman i mekim i go, i go, na ol i luksave olsem i nogat moa rot i stap bilong ol i bihainim.

Em nau, ol i go bek long loa i banisim busgraun bilong pipel, na ol i senisim, bai ol papagraun bilong PNG yet, i no inap long kotim ol divelopa kampani, husta i mekim wok maining na i bagarapim busgraun na wara.

Nau, nupela minista bilong envaironmen, Thompson Harokaqveh i tokaut olsem gavman i redi long rausim ol senis olpela gavman i mekim.

Em i gutpela tingting.

Planti taim, yumi long PNG i save skin kirap hariap tru taim wanpela foren investa i opim paus mani bilong en na tok em i ken kam na kirapim ol bikpela risos bisnis.

Olpela gavman i bin go pas long dispela kain pasin.

Planti ol bikpela wok sekim na glasim i no bin kamap bihainim stretpela rot, taim ol divelopa bilong Ramu Nikel main projek i kam insait long kantri.

Olgeta tok orait, em ol lida long gavman yet i bin givim long gavman bilong Saina.

Narakain long olpela gavman na minista, nupela minista i karim kam nupela tingting.

Em i tok long narapela sindaun bilong palamen long mun Novemba, bai ol dispela rausim bilong ol senis bai kamap.

Em i noken abrus.

Ol pipel bilong kantri i save olsem nupela gavman i traim long pulim tru bilip bilong ol, bai ol i ken givim sapot long en long kam bek long 2012 ileksen.

Wantaim dispela tingting, ol i noken resis long mekim kamap samting, na i no skelim gut tingting long en pastaim. Mipela olgeta long kantri i gat graun, o famili bilong yumi wan wan i gat graun.

Na sindaun bilong ol tumbuna bilong yumi, i kam inap nau long taim yumi sindaun i stap, em yumi save pas strong wantaim busgraun. Gavman i wasman bilong yumi, na em i noken daunim ol rait bilong yumi ol papagraun long banisim gut busgraun bilong yumi.



WANTOK

Published Weekly, Thursday, for
 Word Publishing Company, Ltd.
 P.O. Box 1982, Boroko, NCD
 Papua New Guinea

Telephone: (675) 325 2500
 Fax: (675) 325 2579

Email: editorial@wantok.com.pg

Pe bilong wanpela yia
 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager:
 Elizabeth Konga

Editor
 Neville Choi

Published at
 Portion 445, Kanage Street,
 Six Mile NCD

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Nu Silan lida i laik save watpo sip i pas long rip

NU SILAN (New Zealand) Praim Minista John Key i wok long strongim tok long save long wanem as na wanpela kontena sip i bin pas long graun o rip long wanpela gut-pela hap solwara em i save klia gut long Bay of Plenty.

Em i bin go long balus long lukim pinis hap we dispela birua i bilong sip i kamap long en na tok em i gat tupela gavman inkwairi o wok painimaut gavman i mekim nau long painimaut we dispela sip The Rena, i bin ron na sindaun antap long rip long Trinde las wik.

Balus bilong Praim Minista i bin ron antap long sip i kamap wankain taim ol boskru bilong sip i bin wok long traim long rausim o pamim wel i kam long dispela sip, The Rena i go long wanpela arapela tanka sip

Ol boskru long tupela bas i wok long klinim solwara em wel i bin kapsait long en, ol i namba wan lain wokman i wok long go long wara na klinim ol dispela wel kapsait i go long solwara.

Nu Silan nevi tu i gat tupela sip i go stap long be, we ol i wok long testim ol masin samting o ikwipmen em ol i bin wokim bilong stopim wel long bagarapim solwara.

Samting olsem 200 pipel namel long ol spesolis bilong Australia, Briten, Holen na Singapo, i joinim ol rispons tim, wantaim tu, 300 pipel bilong Difens i stap sambai long nau.

Kapitel bilong Tailen, Bangkok, i stap aninit long wara

SAMPELA hap long kapitel bilong Tailen, Bangkok, i stap aninit long wara.

Bikpela ren i wok long pun-

daun na kamapim bikpela haiwara tru i kamap insait long planti yia.

Zoe Daniel i ripot i kam long kapitel, olsem ol i bin tokim pipel i save stap long ol eria ausait long Is bilong Bangkok, long stap redi long haiwara.

Ol i ting bai wara i kamap long ol eria bilong ol klostu tru, tasol sampela haus bilong pipel na bisnis i bungim hevi pinis long haiwara.

Moa long 100 milimita ren i bin pundaun pinis long kapitel, dispela wiken.

Na ol i wok long toksave bai planti moa ren i kamap.

Pipel i save long stap long ol eria bilong ol olupela o ensen siti, Ayutthaya.

Em i wok long kisim haiwara na ol i wok long kisim aut nau pipel i go long ol sef eria.

Ol i kirapim pinis ol ples bilong pipel i ken go stap long en.

Ol dispela haiwara selta i stap long fifti eit long seventi seven provins i wok kisim haiwara.

Na namba bilong pipel i dai pinis long haiwara nau i kamap long tu handret na faivpela ten o tu handret fifti.

Gavman i wok long traim long wokim ol canal o hipim ol bek wesana raunim ol bikpela infrastraksa bilong traim na banisim gut biktaun bilong ol.

Bikpela namba bilong pipel i dai pinis long tupela taifun

OL Filipins atoriti i tok namba bilong pipel i dai pinis long tupela taifun em i bin hamarim kantri nau i go antap long 101.

Na tu, planti tausen pipel i nogat ples, bikos haiwara i bagarapim ol haus bilong ol.

Taifun Nesat, i bin hamarim pastaim ol eria em i stap daun.

Long ol dispela eria we ol didiman wok i kamap long en long bikpela ailan, Luzon, tupela wik i go pinis.

Na bihain namba tu Taifun Nalgae i bin kamap gen, faivpela de bihain long en.

Sifil Difens opis i tok planti

long ol pipel i bin dai, em ol i bin birua long haiwara long ol faming taun long Luzon.

Ol narapela i bin dai long pawa taim ol pawa lain i bin pundaun.

Ol graun bruk o lenslait tu i bin kamap na pundaun long ol narapela samting.

Twenti seven pipel i wok long lus yet na moa long 67,000 pipel nau ol i stap long ol ivekuesen senta long moa long 40 provins long Luzon.

Ol paia paitman i traim long stopim ol nupela paia

OL paia paitman i wok long traim long stopim ol nupela paia i kamap gen long Sentral Australia.

Ol dispela nupela paia i wok long kirap long dispela taim long Not Is bilong Alice Springs.

Ektng Sinia Faia Opisa, Neil

Phillips, i tok ol paia i bin kirap klostu wanpela wik i go pinis long Plenty Haiwe.

Em i tok foapela o faivpela ol propeti o fam long rijen i stap long rot bilong paia.

Bai ol i mas traim long banisim gut ol bulmakau na ol bilding o haus long paia.

Em i tok sindaun nogut long bus em i mekim ol paia long kamap strong.

Na em i karamapim ol hap bus olsem long 10 kilomita antap long ol maunten eria we bai ol i no inap stopim paia long en.

Praim minista bipo i tok asailum polisi i daunim Australia

AUSTRALIA Praim Minista bipo, Malcolm Fraser i tok asailum sika polisi bilong

Federal gavman i daunim gut-pela nem bilong Australia.

Mista Fraser, em wanpela long ol biknem man bilong Australia husat i bin sainim wanpela pas i go long Federal palamen.

Dispela pas em i singaut long ol i mas stopim polisi long prosesim pepa bilong ol asailum sika long ol senta long ol narapela kantri.

Dispela pas i askim long ol i mas gat prosesim sistem insait yet long Australia.

Tu longlong ol i apim namba bilong ol refuji Australia bai mas kisim i go antap long 25 tausen.

Mista Fraser i tok bikpela namba bilong ol Australia pablik i sapotim prosesim senta insait yet long Australia.

Na ol i tingting bilong ol i soim long pole m i moa long gavman.



Poliamba Limited Em Pat Kampani Bilong New Britain Palm Oil Limited (NBPOL) Grup i nau Askim Husait i laik Mekim Ol Koment Long RSPO Setifiket Asesmen.

Poliamba Limited em pat kampani bilong NBPOL grup husait igat oel pam operesen long Niu Ailan insait long Papua New Guinea. Poliamba Ltd em i olsem pat kampani bilong NBPOL na NBPOL em i memba pinis long RSPO. Poliamba askim BSI Management Systems Singapore Pte Ltd long wokim RSPO Setifikesen Asesmen bilong Poliamba Limited oel pam operesen na bai stat long namba forteen de bilong mun Novemba long yia 2011. Dispela ol lain tim bilong BSI bai wokim asesmen bilong Poliamba Ltd oel pam operesen bai: Allan Thomas hetman bilong audit (OHS, EMS, QMS & NHVAS); Tom Vigus & Mike Finlayson (HCV na Steikholda Consaltesen, Ol Insait wantaim Autsait Steikholda, Ol Wokmeri na ol Famili long Wokmanmeri na tu ol Aspeles lain).

Sapos mipela kisim ol toktok bilong yu insait long 30 pela dei long stat long taim mipela raitim dispela pas, bai mipela lukluk long taim bilong wokim asesmen. Askim i kam long yupela olsem, raitim nem na adres bilong yu. Dispela bai halivim mipela long singautim yu taim mipela i gat sampela askim or luk-save long wanem ol toktok yu raitim na kamapim.

NAME:
ADDRESS:
EMAIL:
PHONE NUMBER:

Sapos yu i no laik ol narapela lain long luksave long ol toktok bilong yu, yu mas raitim "IN CONFIDENCE". Salim ol toktok pas igo long ol dispela lain:

Mr Soon Leong Chia
BSI Management Systems Singapore Pte Ltd
460 Alexandra Road
#08-01/02 PSA Building
SINGAPORE 119963
Email: soonleong.chia@bsigroup.com
Fax +656270 2777

Sander van den Ende
Sustainability Manager
Poliamba Ltd
P.O. Box 46
Kavieng, New Ireland
Papua New Guinea
E-mail: svdende@nbpol.com.pg
Fax: +675 984 2081



Barike i gat kik yet

Barike ben kisim bek memori.

Nicky Bernard i raitim

PLANTI bai ting olsem ol bai no inap kam bek taim tupela fran man bilong dispela ben Barike i dai na lusim foapela man tasol i stap.

Barike ben i bringim bek ol tingting bilong bipo long 1980'S na 1990's long tru tru PNG musik taim ol kam pilai long Mosbi, wanpela nait tasol, long wansol festival.

Dispela lapun ben i pulim planti ol olupela lain husat save bihain musik bilong ol long bipo na tu pulim planti ol nupela musik manmeri husat save laikim stail bilong musik bilong ol.

Barike ben nau i gat sampela ol yangpela man i pilai wantaim ol, tasol ol i no longwei lain. Pikinini man bilong Bes gita man Glen Low husat i dai pinis, Juan Low i kisim ples bilong papa bilong em na pilaim bes nau bilong dispela ben. Pikinini man bilong Lid gita Donald Lesely i pilaim kibod bilong ol. Long sait bilong singsing, ol kisim wanpela yanpela long helpim foapela lapun husat i stap strong yet long ben bilong ol.

Wansol Festival em Unplugged Stereo na FM100 i kamapim long bring bek ol

musik na singsing stail bilong yumi PNG long bipo i mas stap strong, ol dispela olupela ben olsem Barike na ol narapela i holim yet ol stail musik bilong yumi.

Unplugged Stereo na FM100 i bringim tu Edou bilong Nu Kalodonia (New Caledonia) long kam pilai long dispela nait. Edou, husat save laikim stret musik na stail bilong Patti Pots na PNG, i amamas stret long kam bek long PNG namba tu taim long singsing, namba wantaim em kam em long sampela yia i go pinis.

Planti ben long dispela nait i bin statim rekot bilong ol long Pacific Gold Studio long Rabaul na Pot Mosbi taim dispela rekoding studio i stap em yet.

Long opim singsing bilong dispela nait Wansol Fest em Funky na Rushee husat tupela mangi Solomon Ailan, tasol stap wok long Pot Mosbi, mekim singsing bilong tupela.

Grup bilong Autonomous Region bilong Bougainville LZP i go mekim sampela hit singsing bilong ol, bihain long ol em Feedback ben, dispela ben em yangpela mangi husat save pilai musik bilong Pacific Gold Studio long bipo na ol yet kamapim dispela ben, long dispela nait ol tu pilai bilong Anslom long wanem bipo Anslom save singsing wan-



Lapun George Telek (MBE) bilong Painim Wok ben tu pairap long Wansol Pasifik Festival.



Pikinini man bilong olupela bes gita man Glen Low husat i dai pinis, nau pikinini Juan Low i kisim ples bilong papa i kukim Wansol Pasik Festival long las wik Sarere. *Ol foto: Nicky Bernard*



Kaburita husat i lapun lid gita man bilong Barike i no pinis yet long ol stail bilong em long pilai gita.

taim ol.

Bula Talei ben tu i pulim ai bilong sampela manmeri long dispela nait, dispela ben em tripela manmeri pilai wantaim lid singsing meri Elena Onno i go pas long ol.

George Telek em wanpela long olupela musik man insait long kantri bilong yumi, sampela singsing bilong em bilong bipo tu bin kirapim paia long dispela nait. Telek long bipo em go pas long wanpela bikpela ben bilong Rabaul ol kolim Painim Wok ben. Dispela ben wantaim Barike save apim tru musik bilong Rabaul na tu Niugini Ailan na Papua Niugini wantaim.

Edou bilong Nu Kalodonia i kam pilaim sampela feveret singsing bilong em, tasol ol manmeri long dispela nait i putim was tasol long Barike, taim Ankol ET kolim nem bilong ol, danis ples i pas pastaim long ol kam pilai, planti manmeri long dispela nait i tok olsem ol Barike pilai laiv ya em olsem keset o

CD ol harim ya, em soim olsem Barike i pilai gut tru olsem bipo taim tupela leit memba bilong stap.

Planti manmeri long dispela nait i tok tenkyu i go long ol sponsa na Unplugged Stereo na FM100 long bringim bek ol olupela ben bilong bipo long kam pilai, ol tu i tok musik bilong bipo save gat mining na tu ol stail bilong musik em bilong yumi PNG stret.

Planti manmeri nau i singaut gen go long Unplugged Stereo na FM100 long mekim bikpela na kisim moa planti olupela ben bilong bipo long kam na autim ol stail musik bilong bipo.

Ol tok bikpela tenkyu i go long ol ben kam pilai, ol sponsa bilong dispela nait, FM100, Unplugged Stereo, Patti Pots long miksim gut tru ol saund na go man stap beksait long kamapim dispela musik fest Andrew Runawery, darekta bilong Unplugged Stereo long mekim dispela festival we planti manmeri

YUMIFM Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing blong bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ...



Niu Kaledonia French kukim POMCCC...
Yumi Melanesian na Pasifik Ailan, Ol lain bilong France husat stap long Pot Mosbi go sapatim musik man bilong ol bilong Nu Kalodonia.

TENKYU tru long kam pilai. Unplugged Stereo Director Andrew Runawery givim sampela presen i go Edou, musik man bilong Nu Kalodonia wantaim lid gita man bilong em.



Lid git bilong Edou i mekim save long gita bilong em. Ol potu Nicky Bernard

93FM YUMIFM National Weekly Hit Parade:
Produced & Host by: Kasty
Statistics: Talaigu Sophie & Poroman Crew
Week Ending: Saturday - 08th October 2011
Table with columns: Week Before, Last Week, This Week, Charting Song, Artist.

EMTV Television Guide

Table with columns for dates (FONDE, OKTOBA 13, 2011; FRAIDE, OKTOBA 14, 2011; SARERE, OKTOBA 15, 2010; SANDE, OKTOBA 16, 2011; MANDE, OKTOBA 17, 2011) and corresponding TV programs and times.

TORO



BIABIA



KANAGE



TOKWIN

Jackson ples balus senisim wokabaut

POT Mosbi Jackson ples balus kisim liklik senis, planti long pasindia long go kalap long balus i paul liklik long tride moning taim ol wok manmeri i salim ol go long narapela doa. Jackson ples balus nau sapos yu laik kalap long balus bai yu go insait long ples we ol pasindia save kam aut long en. Dispela doa bipo em bilong kam aut taim yu go stretim tiket o go lusim kargo. Ol pasindia kam daun long

balus i gat nupela ples bilong kam aut, dispela ples em long namel domestic na Intanesinal, i gat ples bilong ol manmeri husat i wetim wantok bilong ol long sindaun na wet na bai ken isi long luksave long ol manmeri kam daun long balus. Planti manmeri husat i go wetim ol wantok bilong ol i paul na go sanap long olupela doa na wet stap inap ol lukim ol wantok bilong katim kona long narapela nupela rot. Dispela nupela stail ol mekim i opim tru hap bilong skelim kargo na stretim tiket i go bikipela.

Ramu suga bai stop long hailans...

Gutpela tru!!! Pasim suga long hap! Ol yet i bagarapim sindaun bilong ol yet. Ramu laik givim sevis long ol, tasol ol yet wok long stopim long pasin stil. Pasin raskol tasol i wok long daunim gutpela sevis long ol. Taim gavman laik stretim rot bilong ol, ol i save askim gen gavman long kompensasin. Olsem na rot bilong ol i no save senis liklik. Lusim ol! Noken bisi long ol! Ol i ken stap olsem kanaka!

Tokwin Tasol...

Grid of letters for a word search puzzle, containing words like AIR NIUGINI, AIRLINES PNG, etc.

Table listing airlines and services: BALUS, AIR NIUGINI, AIRLINES PNG, ISLANDS NATIONAL AIR, PLES BALUS, KAGO, KOPI, JIUS, BISKET, SIA, TIKET, SEKIN, LAIP JAKET, EA HOSTES, PAILOOT, SUTKES.

Number crossword puzzle grid with numbers in some cells.

Number crossword puzzle grid with numbers in some cells.

Ansa bilong las wik Sudoku

Word crossword puzzle grid with some letters filled in.

Ansa bilong las wik Pasol

EMTV Television Guide

Table listing TV station open times: 3.00PM G MAGICAL TALES, 3.30PM G HI-5, etc.

Table listing Department of Education Classroom Broadcast: 9.00-9.40AM GRADE 7 MATHEMATICS, etc.

Table listing Wife (Series Premiere) and Trinde, Okta 19, 2011: 9.00PM M 24 Kiefer Sutherland stars in this Emmy Award-winning drama...

Table listing EMTV Midday News and Day 9 Highlights: 12.30PM EMTV MIDDAY NEWS, 5.55PM G CRIME STOPPERS, etc.

named after two Samoan islands. Two former Survivors are back to try for a second chance to win \$1 million prize. Also returning is The Redemption Island twist. The winner of each duel earns the right to continue fighting for a chance to return to the game and compete for the title of Sole Survivor. The loser is sent home. Who will be left standing? 9.00PM PG WEDNESDAY NIGHT MOVIE: TBA 11.45PM G NATIONAL EMTV NEWS REPLAY 1.00AM AUSTRALIA NETWORK

Table listing Tunde, Okta 18, 2011: 5.00AM G JOYCE MEYER Religious program, 5.30AM G TODAY

Table listing National EMTV News: 6.00PM G NATIONAL EMTV NEWS, 7.00PM G HAUS & HOME, etc.

Table listing Trinde, Okta 19, 2011: 5.00AM G JOYCE MEYER Religious Program, 5.30AM G TODAY

Table listing Pacific: 8.00PM PG SURVIVOR SOUTH PACIFIC - The twenty-third instalment of Survivor, with Emmy Award-winning host Jeff Probst...

Ol Program na Kilok i ken senis oltaim...

Raun wantaim Kanage olgeta wik



NEM: Shaun Levi
KRISMAS: 11 (man)
ADRES: Lemakot Primary School, P.O. Box 217 Kavieng, New Ireland Province
SAVE LAIKIM: Sande Skul Lotu, pilai soka, singsing, droim piksa, huk o glasim pis long solwara na wokim garden.

NEM: Mea Joel
KRISMAS: 19 (man)
ADRES: Sapuri Plantation Division Tow 2, P.O. Box 451, Kimbe, W.N.B Provins
SAVE LAIKIM: Pilai spots, harim musik, pilai gita, ridim buk, go Lotu, kuk na raitim pas wantaim ol poroman.

NEM: Abbie Jugunai
KRISMAS: 18 (man)
ADRES: Sapuri Plantation division Tow 2, P.O. Box 451, Kimbe W.N. B Provins
SAVE LAIKIM: Ridim buk, harim musik, pilai sports, wokim gaden, go Lotu, mekim fani, na raitim pas wantaim ol poroman.

NEM: Gladies Donkoh
KRISMAS: 28 (meri)
ADRES: P.O. Box AS 951, Agona Swedru, Ghana- W. A
SAVE LAIKIM: Rit, lainim, mekim poroman long narapela kantri.

NEM: Timothy Tipora
KRISMAS: 25 (man)
ADRES: P.O. Box 340 Mendi, S.H.P
SAVE LAIKIM: Ritim Niuspepa, go Lotu, Ritim Baibel, watsim TV, mekim fani, Harim wantok Radio Lite FM, pilai gita na wok wantaim.

NEM: Rumien Simon
KRISMAS: 18 (man)
ADRES: C/- Rist Brothers, P.O. Box 5274, Lae Morobe Provins
SAVE LAIKIM: Mekim prens wantaim ol Yuts long arapela Provins, ritim Baibel, pilai volibol, Harim Lotu musik na raitim pas.

NEM: Gemimah Johnson
KRISMAS: 30 (meri)
ADRES: OLD FOREST STREET, P.O. Box 971, Akim ODA , Phn 00233-242850880- Ghana, West Africa
SAVE LAIKIM: Senisim presen, harim musik, Danis, painim man long maritim bihain taim

NEM: Jimmy N.Nimms
KRISMAS: 20 (man)
ADRES: Kalipau Village, P.O. Box 96, Vanimo, Sandaun Provins
SAVE LAIKIM: Raitim pas, harim musik, senisim presen, painim wanpela poro long stap na raun wantaim

NEM: J Waspi
KRISMAS: 19 (man)
ADRES: C/- Kilips Village, P.O. Box 96, Vanimo Sandaun Provins
SAVE LAIKIM: Raitim pas, harim musik, senisim presen, painim long stap wantaim na mekim pren

NEM: Millan Maso
KRISMAS: 20(meri)
ADRES: P.O. Box 2340, Boroko, NCD
SAVE LAIKIM: Pilai Volibol, watsim TV (Rugby), harim musik, raitim pas, ritim buk, senisim presen na go Lotu.

Poisen man...

Kanage i mekim haus bilong em long maunten ol i kolim 'Mosou De Tohu Via.'
 Na em i gat tupela rum. Wanpela bilong sindaun na skelim ol meri i go na narapela em bilong slip.
 Wanpela taim long bik nait stret, Kanage i pilim hot na i laik go kisim kol win long nambis. Em i kirap katim i go daun long solwara na em i lukim wanpela man i toilet i stap na em i katim long sait i go.
 Long ples i bin i gat tok win olsem ol poisen man i save raun long bik bus long biknait.
 Taim man i lukim Kanage, em i ting olsem em i poisen man na em i singaut antap stret. Kanage i harim man i singaut na em tu i ting olsem em i wanpela poisen man. Man Kanage i no isi long ron. Em i ron siksti na go hait long



haus lotu.
 Kanage nau i tingim olsem man i wok long toilet i stap. Em i no save olsem man i go kisim ol man meri long painim dispela poisen man na mekim save long en, Kanage tasol.
 Taim em i lukim ol manmeri i kam long haus lotu em i save olsem ol i mas ting olsem em i poisen man.
 Hariap tru em i laitim ol kendel na sindaun i go daun long fom na giaman beten i stap. Taim ol i kam long haus lotu ol paul sapos em tasol o narapela man. Kanage i lukim ol na poreit olsem nogut ol i paitim em.
 Ol i tok olsem nogut poisen man em i Kanage na em i kirap na tokim ol olsem, "Yupela luksave long man na

toktok tu o nogat. Taim man i sindaun na beten i stap em i bikpela itambu tru long toktok o askim long wanpela samting"
 Samting tru em i poreit long ol paitim em na em i giaman tokim ol olsem em i kam long haus lotu long beten.

Madang.

Ol skwat!
 Salim ol gutpela Kanage tok pilai i kam long:
Kanage Tok Pilai
 P.O. Box 1982,
 Boroko, NCD
 Port Moresby.
 Email: atolire@wantok.com.pg

Sumatin i miksim edukesen wantaim ol drag o spakbrus na alkohol o strongpela dring

Dia Laipain,

MI WANPELA sumatin man i gat 18 krismas na mi skul long wanpela nesenel hai skul insait long Nesenel Kapitel Distrik.

Papamama bilong mi i bruk marit na i no stap wantaim. Klostu ol bai divos bikos ol i no stap wantaim insait long las 10-pela krismas. Mi wokim Gret 12 na ol fainol eksam o tes i kam klostu nau. Mi pilim olsem bai mi wokim gut long Gret 12 eksam. Mi save olsem mi ken wokim gut, tasol samting em, mi gat ol wanlain poroman i stap long strit we mi groa bikpela wantaim.

Long planti yia, i nogat rot long abrusim ol na mipela i save dring wantaim, kaikai buai wantaim na olgeta de, mipela i save lukim wanpela narapela na bung. Maski mi gat planti skul wok, em i hat long mi long abrusim ol o tok nogat long ol.

Narapela wari mi gat em ol poro bilong mi ya i wok bihain long ol bin pinisim Gret 10 na go long sampela teknikel skul. Taim ol i kisim pe bilong ol, ol i save baim bia long mi. Mi wari bikos mi mas bekim pasin ol i mekim long baim bia bilong ol.

Mi nogat mani, tasol lans mani we mi kisim long papamama bilong mi tasol. Long las tupela yia, mi wok long stilim mani bilong mama na susa bilong mi long baim bia bilong ol poroman. Mi no laik wokim dispela stil pasin, tasol taim ol poroman i singautim mi long dring wantaim ol, mi save wokim dispela asua gen. Mama na susa i save laik haitim mani bilong ol, tasol taim ol i kam bek long wok, skin bilong ol i save les na ol i save lusim walet bilong ol long ples klia na mi save kisim ol mani long K100 o K200 manimak.

Laipain, mi no laik wokim dispela pasin moa na plis helpim mi. Mi pilim olsem mi wok long kamap wanpela stilman.

WORRIED STUDENT



Dia Pren,

Tenkyu long serim wari bilong yu wantaim mipela long bihain taim bilong yu we yu gat wari long em bikos papamama i no moa stap wantaim. Mekim na yu raun wantaim ol manki na smok, dring taim yu sumatin yet. Mipela i luksave long yu na ol wari yu gat long skul na bihain taim bilong yu.

Mipela i save kisim ol wankain pas long planti lain insait long kantir bilong yumi. Mipela i luksave olsem laip em i hat taim papamama i no stap wantaim long sapatim yu long ol samting yu laikim long en. Mipela i luksave tu olsem tupela papa na mama i mas stap long lukautim na givim stia long ol pikinini long fisikel, spiritual na sosel sait. Na ol i ken mekim gut long skul na ol narapela samting long laip bilong ol.

Mipela i luksave olsem i no yu, tasol planti narapela pikinini insait long kantri i gat dispela kain wari we wanpela papa o mama tasol i lukautim ol i stap. As long ol dispela hevi em i ken pasin bilong ol waitman we mani, gat planti samting na moa o ol narapela samting we ol yet i save long en.

I moabeta yu toktok long papamama bilong yu long ol wari na hevi em bruk marit bilong ol i kamapim, na tokim ol long pilings bilong yu long dispela samting. Dispela i wok long kamap planti tude we planti yangpela pikinini i bungim hevi long selpis pasin bilong ol papamama husat i tingim ol yet na ol i ting olsem ol i smat na salensim wanpela narapela.

I moabeta yu no wari tumas long dispela samting, tasol yu toktok long papamama bilong yu na ol i ken painim rot long helpim yu. Ol i laikim yu na putim yu i go long skul, tasol ol i mas sapatim yu. Em i taim nau yu toktok long ol long wokim bel

gut pasin namel long ol.

Mipela i bilip olsem taim yupela i sindaun na toktok, bai dispela i givim yupela sans long rispektim ol yet na luksave olsem ol i marit na ol i gat bikpela pikinini na ol i ken helpim yu, na yupela olgeta i ken amamas olsem famili.

Pren, yu wari long smok na dring raun wantaim ol poroman husat i mekim na yu wok long stil long mama na susa bilong yu. Mipela i tokim yu stret olsem taim yu raun wantaim ol manki ya, bai yu stil yet long mama na susa bilong yu. Na ol bai kisim polis long yu husat bai holim pasim yu.

Yu ken lukim olsem hevi long famili i ken bagarapim skul na bihain taim bilong yu, na em i ken go nogut sapos yu no harim na bihainim gutpela stia.

I moabeta nau yu abrusim ol dispela poroman bikos dring na smok na i no mekim ol skul wok bai bagarapim yu na bihain taim bilong yu.

Malolo liklik na tingim ol samtign mipela i tokim yu long en. Askim yu yet olsem disisen yu wokim long pas wantaim ol poroman bai kamapaim wanem gutpela samting long laip bilong yu, skul na bihain taim. Stilim mani na dring i kamapim gut laip bilong yu na yu save bungim hevi tu?

I moabeta yu tok tru long yu yet na toktok long papamama o man o meri yu gat luksave long en long helpim yu daunim hevi. Imoabeta yu joinim wanpela yut grup we i strongim ol yut long gat gutpela helti na prodaktiv laip. Inap yu joinim wanpela sios na yut grup?

Bikpela i laikim yu na gutpela long bihain taim bilong yu, na olsem, trastim em tude.

Proverbs 3: 5,6.

Sapos yu gat wari, rait i kam long Life-line, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laipain

Jacksons ples balus long Mosbi lukim senis

Nicky Bernard i raitim

WOKABAUT bilong ol pasindia na manmeri i go kam long Jacksons Intanesenel Ples Balus long Mosbi, nau i senis pinis.

Nesenel Epots Koporesen Limitet (National Airports Corporation Ltd o NAC), husat i save lukautim namba wan bikipela ples balus long kantri, bai opim ol nupela senis em i kamapim bilong lukim gutpela ron bilong ol manmeri i kamap long kisim balus o i kam insait long ol arapela hap kona bilong kantri.

Wantaim strongim bilong wok sekyuriti long ples balus, NAC bai mekim wanpela open de tude (Fonde), long tokaut long ol senis, na opim dua long NAC bai pablik i save moa long en.

Sampela ol kampani i save mekim wok long ronim balus o helikopta tu, bai ol i soim wok bilong ol long pablik tude i go inap Fraide dispela wik.

Ol senis i kamap nau bai lukim ol pasindia husat i laik kisim balus i go aut long Mosbi, bai mas go insait long olpela dua we ol pasindia i save kamaut long en bipo.

Ol pasindia husat i pundaun long Mosbi, nau bai ol i mas bihainim ples bilong wokabaut baksait long ples bilong ol kar i stap long domestik teminal.

Ol senis i lukim tu sanapim bilong ol nupela ples bilong ol manmeri i ken go sindaun malolo gut na wetim balus long pundaun.



NUPELA: Dispela em i nupela ples bilong ol manmeri long sindaun malolo gut, na wetim balus long pundaun long Jacksons ples balus. Foto: Nicky Bernard

Ol Matupit papagraun sanapim tanget long pasim jiotemal projek

OL papagraun bilong Matupit ailan long Is Nu Briten, i planim pinis tanget long ples Rapindik long soim olsem ol i no laikim jiotemal projek i go het inap olgeta tru tru papagraun i kisim luksave.

Dispela projek, em wanpela man Matupit yet, Jack Pidik, i go pas long toktok long wanpela kampani bilong Aislen (Ice-land).

Wanpela ogenaising komiti i bungim tenpela mausman bilong olgeta lain papagraun long Matupit, aninit long li-

dasip bilong Thomas To-Bunbun i no wanbel olsem sainim bilong memorandum ov andas-tening long kirapim projek, i kamap, tasol i no bungim olgeta papagraun.

Mista ToBunbun i tokaut olsem dispela sainim em Mista Pidik yet i bin go na sindaun wantaim ol lain bilong dispela kampani bilong Aislen, na ol i sainim kontrak bilong projek i kirap.

Olgeta papagraun hauslain i bin bung wantaim long agensim dispela sainim.

Mista ToBunbun i tok komiti bilong em i mekim bikipela wok tru long go het wantaim wok sosol meping, na painim ol tru tru papagraun bilong ples we projek bai sanap.

"Nogat wanpela jiotemal developmen bai kamap long graun bilong Matupit, inap olgeta ILG rejistresen wok i pinis. Dispela i mas stap pastaim, bikos em bai opim rot bilong ol papagraun bilong stap insait long wanem ol bikipela divelopmen bai kamap long bihain taim.

Intanesenel De bilong ol rural meri

DISPELA wik Sarere em i Intanesenel De bilong ol Rurel Meri.

Sanap bilong ol meri i wok long kisim bikipela luksave olsem ol i gat strong bilong karim kantri i go het, we ol i save strongim pasin demokrasi, ol i save luksave long ol humen rait, na gutpela bel isi sindaun.

Planti wok glasim i kamap pinis long kantri na wol, i soim olsem ol meri long ples i save hatwok moa long daunim ol hevi bilong hangere na nogat kaikai, inogat gutpela kaikai bilong strongim

bodi, na pasin turangu.

Ol i tokaut pinis olsem ol meri i save wok gaden na ol i save stiaim ol pikinini long kamap ol gutpela manmeri.

Tasol maski ol i save mekim bikipela wok tru long komyuniti, ol i nogat inap rot yet long kisim moa sans na risos. Dispela i save pasim wokabaut bilong ol i go het.

Moa long 100 milian pipel inap long lusim pasin turangu sapos ol meri long ples i gat wankain rot long kisim halivim na strong, olsem ol man i save kisim.

TIME FOR A BREAK

Sale ends Sunday 16th at 10pm

Port Moresby ↔ Brisbane	K 369 (includes GST)
Port Moresby ↔ Sydney	K 730 (includes GST)
Port Moresby ↔ Melbourne	K 880 (includes GST)
Port Moresby ↔ Perth	K 1400 (includes GST)
Port Moresby ↔ Lae	K 229 (includes GST)
Port Moresby ↔ Mt. Hagen	K 299 (includes GST)
Port Moresby ↔ Alotau	K 229 (includes GST)
Port Moresby ↔ Popondetta	K 169 (includes GST)
Lae ↔ Madang	K 179 (includes GST)
Lae ↔ Goroka	K 99 (includes GST)
Wewak ↔ Mt. Hagen	K 240 (includes GST)
Rabaul ↔ Hoskins	K 199 (includes GST)

Fares are one way and for travel between 17th October 2011 and 07th December 2011.

Terms and conditions apply.

Sales period is 05th October 2011 to 16th October 2011.

Availability is limited

Call 1611 (from your digicel phone) or visit www.apng.com

Airlines PNG

COME FLY OUR WAY

- PORT MORESBY** - Level 1, Pacific Place, 321 3400
- MT. HAGEN** - Central Highlands Printers, 542 0662
- Kagamuga Airport, 542 2732
- LAE** - Micro Bank Haus, Fifth Street, 479 5980
- POPONDETTA** - Top Town (opp. Memorial Park), 629 7638
- ALOTAU** - Preston White Street, 641 1288
- GOROKA** - Airport, 532 2532
- TABUBIL** - Airport, 649 9171
- KIUNGA** - Airport, 649 1125
- MADANG** - Global Travel, 422 0011
- KIMBE** - Kimbe Travel Centre, 983 5802
- RABAU** - Rabaul Hotel, 982 1999

1109-21217 PNM



Bruno Garima soim gutpela piksa long ol KBK papagraun

WANPELA papagraun long Kurumbukari eria we bikpela Ramu NiCo Projek i stap long en long Madang provins, em wanpela smatpela man tru husat i gat gutpela tingting long bihain taim.

Nem bilong dispela strongpela man em Bruno Garima. Na em bilong ples Banu, we i stap arere long rot we i go antap long bikpela nikel main long KBK.

Papa Bruno em smatpela man bikos em i tingim bihain taim bilong ol pikinini na tumbuna bilong em. Na wantaim samting em i mekim long eria bilong em long Banu, em wanpela gutpela piksa tru we ating planti ol arapela papagraun long ol arapela bikpela maining na petroleum projek long kantri i no wokim.

Mista Garima i planim ol kain kain strongpela diwai long eria bilong em long Banu, na dispela ol strongpela diwai em i gat bikpela mani long en taim ol i redi long katim long bihain taim. Em planim ol diwai olsem Kwila, Taun, garamut, roswud na ol arapela.

"Mi planim ol diwai ya bikos taim wok bilong maining i pinis long dispela eria, ol pikinini na tumbuna bai wok long timba mi planim. Ol i ken katim na yusim long mekim haus kapa bilong ol na tu salim ol timba long mekim mani."

Mista Garima i wok long pablik sevis bipo, na em i muv i go antap long posisen olsem Deputi Provinsal Edministreta long Simbu provins.

Taim em i kam bek long graun bilong em long ples, planti kain kain toktok o tok-baksait i pas long en long wanem samting tru em bai wokim. Tasol dispela strongpela man i putim han bilong em long graun na mekim wok. Em i planim planti diwai we i gat bikpela veliu bilong en long sait bilong timba.

Kain pasin Papa Bruno Garima i mekim, i soim tru olsem maski wok maining i kamap, em i redim em yet na famili bilong en long wanem helpim ol i ken kisim long bihain taim.

Ramu NiCo Projek i opim dua o rot long Mista Garima long kamap wantaim gutpela tingting long helpim sindaun bilong em wantaim famili na tumbuna long bihain taim.

Kamap bilong Ramu NiCo Projek long KBK na Basamuk long Usino-Bundi na Raikos distrik long Madang provins, i bringim

planti gutpela sevis i go long ol ples na hauslain husat i stap klostu na insait long main eria.

Em i bringim lait i go long hap. Pastaim planti lain i no bin lukim planti kain ol sevis na helpim, tasol nau sevis olsem rot na bris long Ramu i kamap na rot we i katim bikpela maunten na ron i go antap long main eria long KBK. Ol lain bilong ples tu i kisim wok long main na kisim helpim long sapatim famili na komyuniti bilong ol long ples.

Ol lain bilong Australia Bureau ov Mineral Risoses i bin painim nikel long maunten bilong Kurumbukari long 1962. Na insait long 1990s Highlands Pacific i karimaut ol fisibiliti stadi i go inap long yia 2000 Gavman bilong PNG i givim tok-orait long Ramu Nikel Projek long kamap taim ol i sainim Ramu Projek Maining Developmen Kontrak (MDC). Wok konstraksen bilong projek i bin stat long 2007 na i pinis hariap tru insait long tupela yia tasol.

Stat long dispela taim i kam inap long nau, planti ol lain papa husat i bin stap long bipo i wok long lukluk na redi long lukim kaikai bilong dispela bikpela projek i kamap long graun bilong ol. Tasol planti kain kain toktok long stopim komisining bilong main i kamap na operesen i no kamap.

Taim wok bilong komisining i no kamap, em i givim bikpela hevi tru long kampani bikos kampani i lusim bikpela mani tru.

Dispela toktok we i stopim komisining bilong main long KBK em sampela ol lida o bikman long ples i no wanbel long en.

Ol lida long ples husat i makim ol klen olsem Maure, Imuruva, Nokomboi 1, Nokomboi 2 na Pagazi, i laikim projek long go het.

Insait long wanpela leta ol i raitim na sainim nem na salim i go long siaman bilong Kurumbukari LOA ol i tok olsem: "Mipela ol komyuniti i laik tok kliia olsem mipela i no amamas long wanem yupela ol lida bilong mipela i no tok kliia long mipela wanem as tru, yupela i stopim main komisining.

"Olsem na mipela ol dispela lida long ples nau i tokaut olsem wok bilong main komisining i mas go het, na mipela i askim yupela ol lida long kam long ples na bungim mipela husat i stap long ples olsem na mipela i salim dispela pas long yupela.

"Mipela ol dispela man i bung wantaim klostu 200 manmeri na holim bikpela miting. Long miting



Papa Bruno wantaim famili bilong em



Enikwai Helt Senta we Ramu NiCo i wokim bilong ol papagraun long KBK.

mipela i pasim tok olsem plis larim komisining long go het," dispela leta i tok.

Insait long narapela leta we ol lain husat i makim ol meri, yut na sios lida i raitim na sainim em ol i tok olsem: "Mipela ol lain lida bilong ples i no amamas long asosesin i stopim wok bilong komisining bilong main bikos asosesin i no kisim gut tingting bilong mipela ol lain lida long ples.

"Planti bilong yupela ol LOA komiti i no save stap long Kurumbukari na wanem ol hevi bilong mipela yupela i no save. MCC i kam na mipela i lukim sevis na developmen i kamap.

"Mipela ol papa tu i hatwok long dispela projek i kam na planti bilong mipela i dai na planti mipela i lapun pinis na mipela i gat strongpela tingting long lukim wok maining tru i mas kamap,"



Ol papagraun i planim na salim ol kumu long maus bilong Ramu NiCo main na kisim mani.

RAMU NICO Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisining.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim kliia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

Wanpela Ramu NiCo, Wanpela Komyuniti!



PAITIM: Spaika bilong Snipers i no isi long bal agensim ol U-mi Yet long gren fainol gem bilong ol insait long NCD volibol resis las wik long Taurama Leisure Centre.



LUKLUK: Nupela kosa bilong Eastern Stars FC, Jaime Gomez, i lukluk gut long ol trofi insait long opis bilong nupela sponsa bilong ol, CPL. Oi i bung long hap las wik long tokaut long nupela helpim CPL bai givim long ol dispela sisen. **POTO: Andrew Molen**



TIM KALA: Butterflies ragbi lig tim bilong Mosbi soim nupela yunifom bilong ol i kam long sponsa, Kalvaso Property Management, las wik long Mosbi. **POTO: Butterflies**



RONAWE: Pillaia bilong University Tigers i rausim bal long ol birua bilong em bilong Bomana bipo long ol i holim em, long semi fainol gem bilong ol las wik Sarere long NCD AFL resis bilong ol long Amini Park. **POTO: Andrew Molen**



PASIM ROT: Beks pilaia bilong Murat i no laik bai birua bilong em bilong Lagimu i kam klostu long bal insait long divisen wan semi fainol gem bilong ol long Mosbi soka resis las wik Sande long Bisini pilai graun. **POTO: Andrew Molen**

TOKSAVE: Salim ol spots dro bilong yu kam long Feks; 325 2579, e-mel;amolen@wantok.com.pg o kam lusim long Wantok Niuspepa opis long Central Waigani, NCD.

Toovey bai kisim ples bilong Hasler

NARAPELA bipo pilaia bilong Manly bai kisim ples bilong Des Hasler olsem kosa long 2013.

Manly klap i makim em bipo kepten, Geoff Toovey.

Toovey i wok olsem asisten kosa bilong Hasler long 2004 yet na i bin pilai 286 gem bilong klap we i lukim em i bin kepten bilong ol long 1996 taim ol i winim gren fainol.

Ol bikman bilong klap i

tokaut long makim bilong Toovey long Mande nait long dispela wik bihain long ol i bung na toktok gut wantaim olgeta ofisol bilong klap.


Hasler bai stap wanpela moa yia wantaim ol Sea Eagles, long 2012 bipo long em i go long ol Bulldogs long 2013.

Toovey, 42 krismas, i wanbel long dispela wok wantaim tupela yia kontrak na siaman

bilong Manly, Scott Penn, i bilip em i rait man tu bilong mekim dispela wok.

“Mipela olgeta i amamas long dispela,” Penn i tok.

“Mipela i bilip long kamapim narapela gutpela yia gen long 2012 na mipela i save tu olsem Geoff bai mekim gutpela wok gen long yia i kam bihain,” em i tok.



KOSA: Toovey bai kisim ples bilong Hasler long 2013. **POTO:** NRL.com.

Beale no sore long Lockyer

GERARD Beale i pilim nogut olsem em i bam wantaim Darren Lockyer long semi fainol na i stopim gem bilong kepten bilong em tasol dispela Sande bai em i no inap sore long Lockyer taim em i pilai bilong Nu Silan agensim Australia.

Skrubilong Beale i bin brukim bun long pes bilong Lockyer long semi fainol gem bilong ol agensim Dragons taim em i kalap long kisim bal long wanpela kik na Lockyer i sanap aninit long em.

Dispela i mekim na Lockyer i no bin pilai long

narapela gem long go insait long gren fainol na ol Broncos i bin lus.

Lus bilong Broncos i bagarapim tingting bilong ol long pinisim olgeta gem bilong Lockyer wantaim wanpela gren fainol win.

Tasol nau, Beale i tok, em i no wari olsem dispela em i laspela taim bilong klap kepten bilong em long pilai bilong Australia bilong wanem em i laik winim gem bilong Nu Silan tu.

“Taim mi insait long pilai graun em mi laik winim gem bilong Nu Silan, tasol em bai gutpela salens bilong

wanem mi no bin pilai agensim em bipo,” Beale, husat bai pilaim namba wan intanesenel gem bilong em, i tok.

“Em bai gutpela sapos mi pilai agensim em long dispela tua, tasol taim mi go long pilai em mi laik win tasol,” em i tok.

Beale i tok tu olsem Lockyer yet i bin toktok long em bihain long gem olsem em i noken wari tumas long bagarapim pes bilong Lockyer.

“Em i tokim mi olsem dispela kain ol samting i save

kamap insait long gem olsem na mi noken wari tumas.

“Dispela i helpim long daunim wari bilong mi na i mekim mi amamas na nau mi tingting long pilai tasol,” Beale i tok.

Beale i pilaia 11-pela gem tasol bilong ol Broncos tasol gutpela na strongpela pilai bilong em i winim mak bilong ol selekta long kisim em.

Nau em i gat strongpela tingting long kisim wankain strongpela gem i go insait long dispela tes agensim Australia.



NOGET SORE: Beale i laik pilai agensim Lockyer.



MAKIM KANTRI: Bipo Kangaroos winga, Minichiello, bai makim Itali.

Minichiello amamas long makim Itali gen

LASPELA taim Roosters winga, Anthony Minichiello i bin pilai makim Itali, em long 1999 taim ol i laik kwalifai long go insait long 2000 Wol Kap.

Nau, Itali (Italy) i mekim wanpela tim gen long wankain gem na Minichiello i tok em i amamas tru long werim dispela blu jesi bilong ol gen.

Dispela tim bilong Itali wok long redi nau long stap insait long ol Wol Kap kwalifaia gem bilong Yurop we bai stat long wik i kam.

Minichiello i tok, ol i bin traim long 1999 tasol i bin lus na i no go long Wol Kap tasol nau ol i gat strongpela tingting long pilai gut moa.

“Long 1999 taim mi pilai, mipela i no mekim gut, tasol nau mipela i laik mekim histri na go insait long wol kap,” Minichiello i tok.

Itali i bilip dispela em i wanpela strongpela tim ol i mekim nau.

Minichiello, husat i winim golden but awod

long 2005 olsem nambawan pilaia long wol, bai go pas olsem kepten wantaim strongpela tingting long kisim tim i go insait long 2013 wol kap.

Long 1999, ol arapela kantri olsem Frans (France), Moroko (Morocco) na Lebanon i bin stap insait long dispela salens, tasol Lebanon i bin win.

Nau, Itali bai bungim Lebanon gen, na ol i gat dinau long bekim, taim tupela i bung long Oktoba 29 long Makis stadion.

Namba wan gem bilong Itali bai kamap agensim Rasa (Russia) long Stadio Comunale del Plebiscito long Padova.

Las wik ol i bung wantaim ol bikman bilong gavman, Itali Olimpik Komiti na tu ol sponsa, antap long MSC Musica, wanpela bikpela bot bilong ol turis.

Dispela bung i kamap long Padova, long Itali, long bungim sapot bilong nesanel ragbi lig tim bilong ol.

Stars laik kamap nambawan

I kam long Bek pes...

"Mipela i mas wok hat moa long stretim na strongim tingting na pasin bilong mipela insait na autsait long pilai graun olsem ol gutpela spotsman.

"Dispela bai helpim mipela long lainim pasin bilong harim na bihairim tok na tu apim gem bilong mipela," Ealadona i tok.

Tim i gat bilip tu long nupela kosa, Jaime Gomez, husat i bin wanpela profesenol pilai bilong kantri Sili (Chile) bipo.

Gomez i tok em bai mekim soka i kamap olsem laip bilong dispela ol pilai husat i stap wantaim em.

"Mipela bai yusim soka long kamapim wanpela pikinini long strit husat i luk olsem em i nogat samting long mekim long laip bilong em.

"Soka i ken kamapim planti samting bilong husat man i meri pilaim dispela gem bilong wanem em i bikpela spot tru na ol manmeri save baim bikpela mani long go lukim wanpela gem," Gomez i tok.

"Sapos yu laik kamap gut o kamap nambawan na kisim ol gutpela samting we soka i

ken givim long yu, orait, yu mas wok hat long trening na wokhat moa long trening tu," em i tokim ol pilai bilong em.

Ol pilai tu i tok ol i redi long bungim bikpela salens long ol arapela tim dispela sisen na amamas tu long Gomez long kamap olsem kosa bilong ol.

"Em i gat planti eksperiens na save long gem na mipela redi long lainim wanem kain samting em i laik soim long mipela," sinia pilai, Cyril Muta i tok.

Muta i tok Gomez i kisim nupela kain tingting na pasin bilong pilai kam long tim we planti bilong ol i no bin save bipo na dispela i ken helpim ol long sanap strong antap long ol arapela tim.

"Em i soim mipela long nupela kain stail bilong pilai we planti ol arapela bikpela kantri bilong soka long wol i wok long bihairim tete na em i gutpela tru," Muta i tok.

Namba wan gem bilong ol Stars dispela wiken bai kamap agensim Petro Souths FC long Mosbi we ol bai statim wokabaut bilong ol long traim kamap nambawan.

Helpim bilong Bulhage long ol Lahanis

John Supa i raitim

BIPO fowet bilong Hailans Zon na Goroka Lahanis, Joe Bulhage, i tingim yet ragbi lig na long las wik Sande, i bin givim helpim i go long olpela tim bilong em, Bintangor Goroka Lahanis.

Long las wiken, Bulhage i givim moa long K3,000 i go long ol pilai husat i soim gutpela gem tru long fil (Man of the Match).

Em i givim dispela mani long 5-pela gem ol Lahanis i pilaim, na long husat i bin soim strongpela gem long fil long ol gem we i bin kamap long Nesanel Spots Institiut (NSI) long Goroka.

Kepten bilong Lahanis, Glen Nami, i kisim bikpela hap bilong dispela K3,000 bilong wanem em i bin kamap antap (Man of the Match) long planti long ol dispela gem long hap.

Bulhage i tok, olsem bipo pilai, klab edministreta bilong Nowek Royals long Goroka, na tu olsem olpela siaman bilong ol selekta bilong Lahanis long 1990's, em i helpim bikpela sponsa bilong tim, Bintangor, long givim helpim i go long ol pilai long mekim ol i pilai gut.

Insait long dispela yia, Bulhage i givim samting olsem K5, 000 long ol Lahanis pilai husat i soim gutpela gem.

Em i tokaut pinis long givim narapela K3, 000 i go long ol Lahanis taim ol i go pilai long gren fainol.



WET I STAP: Nami wantaim ol Lahanis i wetim narapela tim i stap long gren fainol, ol i kisim bikpela sapot long ol sponsa na gavman long helpim ol i redi long pilai gut. POTO: WANTOK

Ol Lahanis i bin bagarapim sindaun bilong Agmark Gurias 28-18 long kisim ples long gren fainol bilong Digicel Kap Ragbi Lig resis.

Wina bilong gem namel long Toyota Enga Mioks na Gurias long Mosbi dispela wik Sande bai bungim Lahanis long gren fainol.

Ol Lahanis i bin winim dispela NRL resis long 2010 na i gat strongpela tingting long mekim wankain samting dispela yia tu.

Bulhage i tok pinis olsem em bai givim K200 long olgeta trai na tu K200 long ol gutpela takol na K500 long gren fainol.

Long las wik Sande, tupela lokol memba bilong Isten Hailans i givim sampela mani go tu long ol Lahanis.

Memba bilong Goroka na Minista bilong Envairomen na Konsevesen, Thompson Harokaveq i givim K20, 000 na Minista bilong Intenol Sekyuriti, John Boito, i givim K10, 000.

Ol dispela memba i kam nau tasol na helpim ol lain husat i helpim Lahanis long pastaim yet, olsem Gavana bilong Isten Hailans, Malcolm Kela Smith, husat i givim K150,000, Memba bilong Unggai-Bena, Benny Allen, husat i givim K10,000, na Memba bilong Dauulo, husat i givim K24,000.

Ol narapela MP bilong Isten Hailans i bai givim helpim tu pastaim long Lahanis i go insait long gren fainol.

Ol grasrut i ken winim gol medol

PAPUA Niugini laik gutpela pilai na strongpela tingting bilong Pasifik Gems i mas stap yet long ol pilai na ofisol bilong ol taim dispela bikpela pilai kam long Mosbi long 2015.

Long dispela as, PNG Sports Federation and Olympic Committee (PNGSFOC) wantaim PNG Sports Foundation (PNGSF) i wokbung long kamap wanpela trening woksop long lukluk long dispela.

Nem bilong dispela trening woksop em Grassroots to Gold (Long Grasrut i go long Gol) na em bai kamap long Mosbi long Novemba 5 na 6, dispela yia.

Astingting bilong dispela program em long luksave long ol yangpela na nupela pilai long grasruts level bilong PNG na kisim ol long trening gut na redi long dispela bikpela gem.

Secretary General bilong PNGSFOC, Auvita Rapilla, i tok ol Nesanel Federesen bilong wanwan spots i mas salim wanpela ofisol bilong ol i kam long dispela bung

bilong wanem em i bikpela samting tru na ol bai tokaut tu long planti bikpela samting long hap.

"I gat ol bikpela samting mipela bai toktok long en long redim ol plen na wok bilong kamap insait long dispela Grassroots to Gold program," Rapilla i tok.

Ol i bin askim wanwan Nesanel Federesen tu long givim ol "Readiness Assessment Tool" (RAT), ripot bilong ol bipo long ol i kamap long dispela trening woksop.

Dispela RAT ripot em namba tu ripot ol i sapos long wokim bihairim long namba wan RAT ripot ol i bin mekim las yia.

I gat 8-pela het toktok insait long dispela RAT ripot we ol Nesanel Federesen i mas lukluk long en na mekim wanem level bilong ol long pilai insait long dispela Gems na tu long sait bilog kamapim na ronim ol kain bikpela gem olsem.

Dispela 8-pela het tok we ol i mas bihairim em Gavenens (Governance), Menesmen (management),

Spots wok (Spots activity), komyunikesen (communications), fainens (finance), ol risos (physical resources), ol wokmanmeri (human resources) na velu (value).

Rapilla i laikim ol spots i givim tu stratejik plen bilong ol wanwan i go long PNGSFOC bipo long Okotba 14, dispela yia.

Em i laik lukim olsem olgeta spots i gat ol plen bilong ol i redi bipo long dispela Grassroots to Gold program i stat long 2012.

Ol bai toktok long ol dispela samting taim ol i bungim long dispela woksop.

Rapilla i tok tu olsem ol i wok long mekim wanpela bikpela plen bilong PNG tim long 2015 we bai lukluk long mekim tim i stap na ron gut long 2015 na tu pilai gut moa.

Em i tok ol bai toktok wantaim wanwan spot long save long wanem kain samting ol i laikim long spot bilong ol insait long dispela plen.

Badminton kamapim nesanel federesen

BADMINTON em nupela spot long kamapim wanpela Nesanel Federesen bilong en insait long Papua Niugini.

Papua New Guinea sports Federation and Olympic Committee (PNGSFOC) wantaim Oceania Badminton Confederation (OBC) i tokaut long dispela nupela Federesen las wik.

PNGSFOC na OBC i tok tu olsem ol i gat bikpela sapot long dispela spot long kamapim wanpela Nesanel Federesen bilong ol insait long kantri.

I nogat planti manmeri tumas i save long dispela spot o i save pilaim tasol i gat wanpela aweanes wok bai kamapim long soim na skulim ol manmeri long en.

Developmen Menesa bilong OBC,

Nadia Bleaken, i kam long PNG long Trinde dispela wik na bai stap inap long Oktoaba 21 long kamapim na ronim dispela wok aweanes.

Astingting bilong dispela aweanes wok em long sapotim kamap bilong dispela nupela federesen na tu long kamapim na strongim ol badminton klap insait long kantri.

Ol i laik kisim dispela spot i go long skul insait long kantri tu.

"Mipela i laik kisim badminton i go long ol skul long yusim insait long ol spots program bilong ol sumatin," Bleaken i tok.

Dispela wok aweanes bai givim sans tu long ol badminton klap long kisim moa sapot long trening bilong ol na tu ol arapela samting bilong trening na pilai.

Badminton em i wanpela spot we i save kamap tu long Olimpik na Komonwelt Gems na em i stap tu long program bilong Pasifik Gems.

I save gat 5-pela divisen bilong badminton insait long dispela ol bikpela tonamen na ol i makim olsem em i stap long namba 5 ples olsem spot we planti moa manmeri long wol i save long en.

Em i spot we ol i save yusim reket (racquet), o samting bilong paitim bal olsem ol i save yusim long tenis, na i wankain olsem bet.

Bleaken i tok bel bilong em i kirap stret long kam long PNG long mekim dispela aweanes long hia.

"Olgeta manmeri ken pilai dispela gem, maski sapos krismas bilong ol i tri o 87, olgeta i ken pilai," em i tok.

Badminton em i no hatpela gem

tumas, tupela o 4-pela man long tupela tim i ken pilai insait long wanpela gem.

"Kain kain manmeri ken pilai long spit na level bilong ol wanwan na i gutpela tu long ol manmeri pilai long wanpela bung o grup o family, taim ol i laik malolo na amamas wantaim tasol,"

Ol i singaut nau long ol pilai, kosa na ol manmeri husat i laik traim dispela spot na helpim long developmen bilong em, long wokbung wantaim dispela aweanes program taim em i kamap long hia.

Husat i laik save moa i ken ringim Loretta Hasu o Andrew Lepani long PNGSFOC long dispela ol namba; 3230114, 3251411, 3230108 o 71001063.

Stars laik kamap nambawan Tingting long winim Hekari

WANTOK FOTO.



WANPELA TINGTING:
Ol Stars i gat bikpela tingting long NSL.

Andrew Molen i raitim

CITY Pharmacy Eastern Stars i gat wanpela tingting tasol, dispela em long winim sempion PNG tim, Hekari United, na kamap nambawan.

Bosman bilong Stars, Joseph Ealadona i bilip tim bilong em i gat bikpela sans long mekim dispela dri-man bilong ol i kamap tru dispela sisen.

Em i tok, ol bai paia stret long taim namba wan gem bilong sisen i stat dispela Sarere i go inap long 2012 taim em i pinis.

Ealadona i tok, ol Stars i soim gutpela mak long ol gem bilong ol long las tripela yia ol i stap insait long Nesenel Soka Lig (NSL) na ol i laik go moa yet.

“Tingting bilong mipela em long winim Hekari, i go winim O’Lig (O’ League) na tu winim Wol klap sempionsip,” em i tok.

Dispela em ol bikpela samting tru bilong tim long lukluk long en tasol strongpela gem na gutpela kirap bilong klap long las tripela yia i strongim ol long dispela bilip.

Long namba wan yia bilong tim, ol i lus long semi fainol long wanpela poin, long namba tu yia, ol i lus long gol difrens o pesentis (percentage) bilong wanem ol i win tasol ol i no putim planti gol tumas olsem narapela tim insait long yia, na long namba tri yia bilong ol, ol i go long gren fainol wantaim Hekari na i lus.

I go moa pes 31

Johnston's Pharmacies

For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.

All Sport and First Aid requirements.

**P.O.Box 1066 Boroko.
Phone 325 3185. Fax 325 0190.
Email sales@johnstons.com.pg."**